

**An Bhruiséil, 23 Bealtaine 2025
(OR. en)**

9113/25

**Comhad Idirinstitiúideach:
2025/0039 (COD)**

**SIMPL 30
ANTICI 35
ECOFIN 569
EF 154
DRS 44
COMPET 393
FIN 524
COH 75
CODEC 624
ENV 365
CLIMA 156**

NÓTA

ó:	Ardrúnaíocht na Comhairle
chuig:	An Chomhairle
Uimh. an doic. roimhe seo:	8472/25
Uimh. an doic. ón gCoim.:	COM(2025) 87 final
Ábhar:	Togra le haghaidh RIALACHÁN lena leasaítear Rialachán (AE) 2023/956 a mhéid a bhaineann le simpliú agus neartú an tsásra coigeartaithe carbóin ar theorainneacha - Cur chuige ginearálta

RÉAMHRÁ

1. I mí Dheireadh Fómhair 2024, d'fhoneo iomaíochas an Aontais a fheabhsú agus acmhainneacht iomlán an Mhargaidh Aonair a bhaint amach, d'iarr an Chomhairle Eorpach 'ar institiúidí uile an Aontais, ar na Ballstáit agus ar na páirtithe leasmhara, mar ábhar tosaíochta, an obair a thabhairt ar aghaidh, go háirithe mar fhreagairt ar na dúshlán a sainaitníodh sna tuarascálacha ó Enrico Letta ('I bhfad níos mó ná margadh') agus ó Mario Draghi ('Todhchaí iomaíochas na Eorpa')¹. I nDearbhú Bhúdaipeist an 8 Samhain 2024, ina dhiaidh sin, iarradh go ndéanfaí

¹ 25/24, pointe 31.

‘réabhlóid simpliúcháin a sheoladh, lena n-áiritheofar creat rialála soiléir, simplí agus cliste do ghnólachtaí agus lena ndéanfar laghdú suntasach ar ualaí riaracháin, rialála agus tuairiscithe, go háirithe do FBManna’².

2. An 26 Feabhra 2025, mar obair leantach ar an iarraidh ó Cheannairí an Aontais, chuir an Coimisiún dhá phacáiste ‘*Omnibus*’, mar a thugtar orthu, ar aghaidh, arb é is aidhm dóibh an reachtaíocht atá ann cheana i réimse an tuairiscithe inbhuanaitheachta, agus cláir infheistíochta áirithe de chuid an Aontais, a shimpliú.
3. Mar chuid de na pacáistí ‘*Omnibus*’ sin, d’eisigh an Coimisiún an Togra le haghaidh Rialachán ó Pharlaimint na hEorpa agus ón gComhairle lena leasaítear Rialachán (AE) 2023/956 a mhéid a bhaineann le simpliú agus neartú an tsásra coigeartaithe carbóin ar theorainneacha (SCCT)³.
4. Sa téacs simplithe sin, molann an Coimisiún díolúine níos leithne ó oibleagáidí SCCT, trí allmhaireoirí a dhíolmhú, nach sáraíonn tairseach aonair mhaibhúnaithe (arna ríomh mar mhais charnach in aghaidh an allmhaireora in aghaidh na bliana), arna socrú ar leibhéal 50 tona d'earraí allmhairithe. Thiocfadh an tairseach nua sin in ionad fhorálacha reatha Rialachán SCCT lena ndíolmhaítear earraí ar luach diomaibhseach (in aghaidh na coinsíneachta agus i mbagáiste pearsanta). Leis an mbeart atá beartaithe, díolmhófar, i bhformhór na gcásanna, ó oibleagáidí SCCT FBManna agus daoine aonair a allmhairíonn cainníochtaí beaga nó diomaibhseacha de na hearraí a chumhdaítear le Rialachán SCCT.
5. Thairis sin, tá roinnt simplithe sa togra do gach allmhaireoir earraí SCCT os cionn na tairsí. Go háirithe, baineann sé sin leis an nós imeachta um údarú, leis na próisis bailithe sonraí, le ríomh na n-astaíochtaí leabaithe, leis na rialacha maidir le fíorú astaíochtaí, le ríomh dhliteanas airgeadais na ndearbhóirí SCCT údaraithe le linn bhliain na n-allmhairí isteach san Aontas, agus leis an éileamh ó dhearbhoirí SCCT údaraithe ar phraghsanna carbóin a íoctar i dtríú tíortha.
6. Sna conclúidí uaithi an 20 Márta 2025, thathantaigh an Chomhairle Eorpach ar ‘na comhreachtoirí an obair ar na pacáistí Omnibus um shimpliú [...] a thabhairt chun cinn mar ábhar tosaíochta agus le hardleibhéal uaillmhéine, d’fhonn iad a thabhairt chun críche a luaithe is féidir in 2025’⁴.
7. Thug Coiste Eacnamaíoch agus Sóisialta na hEorpa a thuairim uaidh an 29 Aibreán 2025. Chinn Coiste Eorpach na Réigiún gan tuairim a thabhairt uaidh.

² SN 53/24.

³ 6609/25 + ADD1, ADD2.

⁴ 1/25, pointe 13(c).

8. Ghlac Parlaimint na hEorpa a seasamh ar an gcéad léamh an 22 Bealtaine 2025⁵.

II. STAIID NA hIMEARTHA

9. Laistigh den Chomhairle, scrúdaigh an Mheitheal Antici (Simpliú), an grúpa tiomnaithe a bunaíodh an 21 Feabhra 2025 chun obair a dhéanamh ar thograí maidir le simpliú⁶, scrúdaigh sí an togra ón gCoimisiún agus chuir sí bailchríoch ar an bplé ullmhúcháin ar leibhéal na Meithle an 30 Aibreán 2025.
10. Scrúdaigh Coiste na mBuanionadaithe (Cuid 2) an téacs comhréitigh is déanaí ón Uachtaránacht an 21 Bealtaine 2025⁷. Chomhaontaigh na toscaireachtaí uile leis an téacs agus chinn an Coiste an téacs sin (gan aon leasú) mar a leagtar amach san Iarscríbhinn a ghabhann leis an nóta seo é a chur ar aghaidh chuig an gComhairle d'fhonn teacht ar Chur Chuige Ginearálta.
11. Tá sé tábhachtach a mheabhrú go meastar go dtabharfar aghaidh ar roinnt saincheisteanna sonracha a d'ardaigh na toscaireachtaí agus nach gcumhdaítear leis an togra ón gCoimisiún maidir le SCCT a shimpliú i gcomhthéacs an ghrinn-athbhreithnithe atá le teacht ar SCCT ag deireadh 2025, mar a fhoráiltear in Airteagal 30 de Rialachán SCCT.

III. CONCLÚID

12. I bhfianaise an mhéid sin, iarrtar ar an gComhairle (Gnóthaí Ginearálta), ag an gcruinniú a bheidh aici an 27 Bealtaine 2025, teacht ar Chur Chuige Ginearálta mar a leagtar amach san Iarscríbhinn a ghabhann leis an nóta seo é.

Is é a bheidh sa chur chuige ginearálta sainordú na Comhairle don chaibidlíocht le Parlaimint na hEorpa amach anseo i gcomhthéacs an Ghnáthnós Imeachta Reachtaigh.

⁵ [Tuarascáil ar an Togra le haghaidh Rialachán ó Pharlaimint na hEorpa agus ón gComhairle lena leasaítear Rialachán \(AE\) 2023/956 a mhéid a bhaineann le simpliú agus neartú an tsásra coigeartaithe carbóin ar theorainneacha | A10-0085/2025 | Parlaimint na hEorpa](#)

⁶ 6340/25.

⁷ 8472/25.

DRÉACHT

RIALACHÁN Ó PHARLAIMINT NA hEORPA AGUS ÓN gCOMHAIRLE

lena leasaítear Rialachán (AE) 2023/956 a mhéid a bhaineann le simpliú agus neartú an tsásra coigeartaithe carbóin ar theorainneacha

(Téacs atá ábhartha maidir le LEE)

TÁ PARLAIMINT NA hEORPA AGUS COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe Airteagal 192(1) de,

Ag féachaint don togra ón gCoimisiún Eorpach,

Tar éis dóibh an dréachtghníomh reachtach a chur chuig na parlaimintí náisiúnta,

Ag féachaint don tuairim ó Choiste Eacnamaíoch agus Sóisialta na hEorpa⁸,

Ag féachaint don tuairim ó Choiste na Réigiún⁹,

Ag gníomhú dóibh i gcomhréir leis an ngnáthnós imeachta reachtach,

De bharr an mhéid seo a leanas:

⁸ IO C , , lch. .

⁹ IO C , , lch. .

- (1) Le linn na hidirthréimhse, ar cuireadh tús léi an 1 Deireadh Fómhair 2023, tá sonraí agus faisnéis á mbailiú ag an gCoimisiún maidir le cur chun feidhme an tsásra Coigeartaithe Carbóin ar Theorainneacha ('SCCT') dá bhforáiltear i Rialachán (AE) 2023/956 ó Pharlaimint na hEorpa agus ón gComhairle¹⁰, lena n-áirítear é sin a dhéanamh trí anailís a dhéanamh ar thuarascálacha ráithiúla arna dtíolacadh ag dearbhóirí tuairiscithe. San fhaisnéis a bailíodh agus sna malartuithe leis na páirtithe leasmhara, lena n-áirítear malartuithe a rinneadh mar chuid den ghrúpa saineolaithe maidir le SCCT, leagadh amach féidearthachtaí maidir le SCCT a shimpliú agus a fheabhsú. Tá an tAontas tiomanta do chur i bhfeidhm rianúil SCCT a áirithiú le linn na tréimhse iar-idirthréimhsí dar tús an 1 Eanáir 2026.
- (2) Ar bhonn na taithí a fuarthas agus na sonraí a bailíodh le linn na hidirthréimhse, léiríonn dáileadh allmhaireoirí earraí SCCT isteach san Aontas nach bhfuil ach sciar beag d'allmhaireoirí freagrach as formhór mór na n-astaíochtaí leabaithe sna hearraí sin. Is cosúil nach leor an maolú a cuireadh i bhfeidhm maidir le hallmhairiú earraí ar luach diomaibhseach dá dtagraítear in Airteagal 23 de Rialachán (CE) Uimh. 1186/2009 (coinsíneachtaí ar lú a luach ná EUR 150) chun a áirithiú go mbeidh feidhm ag SCCT maidir le hallmhaireoirí i gcomhréir lena dtionchar ar astaíochtaí a chumhdaítear le Rialachán (AE) 2023/956. I gcás na n-allmhaireoirí sin a allmhairíonn cainníochtaí beaga earraí, d'fhéadfadh ualach míchuí a bheith ag baint le comhlíonadh oibleagáidí tuairiscithe agus airgeadais SCCT. Dá bhrí sin, ba cheart maolú nua a thabhairt isteach chun allmhaireoirí cainníochtaí beaga i dtéarmaí maise d'earraí SCCT a dhíolmhú ó oibleagáidí SCCT agus, an tráth céanna, cuspóir comhshaoil an tsásra sin agus a chumas a chuspóir aeráide a bhaint amach á gcaomhnú.

¹⁰ Rialachán (AE) 2023/956 ó Pharlaimint na hEorpa agus ón gComhairle an 10 Bealtaine 2023 lena mbunaítear sásra coigeartaithe carbóin ar theorainneacha (IO L 130, 16.5.2023, lch. 52, [ELI: http://data.europa.eu/eli/reg/2023/956/oj](http://data.europa.eu/eli/reg/2023/956/oj)).

- (3) Ba cheart tairseach nua bunaithe ar mhais charnach in aghaidh an allmhaireora in aghaidh na bliana a thabhairt isteach i Rialachán (AE) 2023/956 agus a shocrú ar dtús ar leibhéal 50 tona. Ba cheart feidhm a bheith ag tairseach mhais-bhunaithe aonair go carnach maidir le gach earra in earnáil an iarainn agus na cruach, an alúmanaim, na leasachán agus na stroighne. I gcás nach sáraíonn glanmhais na n-earraí uile arna n-allmhairiú ag allmhaireoir i mbliain féilire ar leith an tairseach mhais-bhunaithe aonair go carnach, ba cheart an t-allmhaireoir sin a dhíolmhú, sa bhliain féilire ábhartha, ó na hoibleagáidí faoin Rialachán seo. I gcás ina sáraíonn allmhaireoir, le linn na bliana féilire ábhartha, an tairseach mhais-bhunaithe aonair, gan stádas dearbhóra SCCT údaraithe a bheith faighte aige, ba cheart an t-allmhaireoir sin a bheith faoi réir pionós i gcomhréir le hAirteagal 26(2a). I gcás ina bhfuil sé beartaithe ag an allmhaireoir sin leanúint d'earraí a allmhairiú sa bhliain féilire ábhartha, ba cheart é a bheith faoi réir oibleagáidí faoin Rialachán seo i ndáil leis na hastaíochtaí uile atá leabaithe sna hearraí uile a allmhairítear sa bhliain féilire ábhartha, lena n-áirítear, go háirithe, an oibleagáid stádas dearbhóra SCCT údaraithe a fháil, an oibleagáid dearbhú SCCT a chur isteach i ndáil leis na hastaíochtaí uile atá leabaithe sna hearraí uile a allmhairíodh sa bhliain féilire ábhartha agus an oibleagáid deimhnithe SCCT a cheannach agus a thabhairt suas i ndáil leis na hastaíochtaí sin go léir.

- (3a) Tá difríocht shuntasach idir príomhghnéithe, mar shampla méideanna allmhairí, patrúin trádála, faisnéis chustaim agus déine astaíochtaí in earnáil na hidrigine agus an leictreachais i gcomparáid le hearnálacha an iarainn agus na cruach, an alúmanaim, na leasachán agus na stroighne. Tugann na difríochtaí sin le tuiscint go mbeadh gá le coigeartuithe casta a thabhairt isteach chun allmhairí leictreachais agus hidrigine a chuimsiú faoi thairseach mhais-bhunaithe aonair nach bhféadfaí costais riaracháin d'allmhaireoirí sna hearnálacha sin a laghdú go mór leo. Dá bhrí sin, níor cheart allmhairí hidrigine nó leictreachais a áireamh faoin díolúine *de minimis*.
- (4) Le bunú na tairisí mais-bhunaithe aonair lena léirítear meándéine astaíochtaí mhéid na n-earraí allmhairithe, saothraítear an cuspóir atá ann maidir lena áirithiú go bhfanfaidh 99 % ar a laghad d'astaíochtaí atá leabaithe in earraí allmhairithe faoi raon feidhme SCCT. Is cur chuige láidir spriocdhírithe é sin toisc go léiríonn sé ar bhealach cruinn cineál comhshaoil agus cuspóir aeráide SCCT agus an t-ualach riaracháin a bhaineann le SCCT ar allmhaireoirí á laghdú go suntasach ag an am céanna, toisc go ndíolmhófar formhór mór na n-allmhaireoirí ó na hoibleagáidí faoi SCCT agus, ag an am céanna, leanann SCCT d'fheidhm a bheith aige maidir le 99 % ar a laghad d'astaíochtaí atá leabaithe sna hearraí allmhairithe. Is cur chuige é lena gcuirtear deireadh leis an riosca imchéimniúcháin freisin trí roinnt shaorga coinsíneachtaí arna déanamh ag allmhaireoir aonair.

- (5) Ba cheart don Choimisiún measúnú a dhéanamh gach bliain, ar bhonn na sonraí allmhairiúcháin do na 12 mhí féilire roimhe sin, maidir le cé acu ar tharla nó nár tharla athrú ábhartha ar mheándéine astaíochta na n-earraí nó ar an bpatrún trádála in earraí, lena n-áirítear cleachtais imchéimniúcháin. Chun a áirithiú go bhfanfaidh 99 % ar a laghad d'astaíochtaí atá leabaithe sna hearraí allmhairithe faoi raon feidhme SCCT, ba cheart don Choimisiún gníomhartha tarmligthe a ghlacadh chun an tairseach mhais-bhunaithe aonair a leagtar amach i bpointe 1 d'Iarscríbhinn VII a leasú trí úsáid a bhaint as an modheolaíocht a leagtar amach i bpointe 2 den Iarscríbhinn sin. Chun éifeachtacht agus cinnteacht a áirithiú, níor cheart don Choimisiún na gníomhartha sin a ghlacadh ach amháin i gcás ina n-imíonn luach na tairsí a eascraíonn as sin níos mó ná 15 thona ón tairseach is infheidhme. Ba cheart feidhm a bheith ag an tairseach leasaithe ó thús na bliana féilire dár gcionn.
- (6) Chun a áirithiú go mbeidh an maolú spriocdhírithe go leordhóthanach, ba cheart feidhm a bheith ag an tairseach mhais-bhunaithe aonair maidir le gach allmhaireoir, lena n-áirítear iad siúd a bhfuil stádas dearbhóra SCCT údaraithe acu. Chun na críche sin, ba cheart allmhairí an allmhaireora a chur san áireamh gan beann ar cé a d'allmhairigh iad - an t-allmhaireoir nó an t-ionadaí custaim indíreach. Ba cheart a cheangal ar an ionadaí custaim indíreach i gcónaí, mar gheall ar chineál a ghníomhaíochta agus ar na hoibleagáidí gaolmhara faoi Rialachán (AE) 2023/956, an stádas mar dhearbhoir SCCT údaraithe a fháil, sula ngníomhóidh sé thar ceann allmhaireora i ndáil le hearraí a liostaítear in Iarscríbhinn I. I gcás inar sháraigh allmhaireoir, a ndéanann ionadaí custaim indíreach amháin nó roinnt acu ionadaíocht air, an tairseach mhais-bhunaithe aonair, ba cheart do gach ionadaí custaim indíreach atá ag gníomhú mar dhearbhoir SCCT údaraithe dearbhú SCCT a chur isteach i ndáil leis na hearraí a d'allmhairigh an t-ionadaí custaim indíreach sin isteach i gcríoch chustaim an Aontais, lena n-áirítear earraí faoi bhun na tairsí, i gcás na n-allmhaireoirí sin a ndéantar ionadaíocht orthu a sháraigh an tairseach, agus líon na ndeimhnithe SCCT a chomhfhreagraíonn d'astaíochtaí atá leabaithe sna hearraí sin a thabhairt suas.

- (6a) Ar mhaithe le deimhneacht dhlíthiúil, i gcás ina ngníomhaíonn ionadaí custaim indíreach mar dhearbhoir SCCT údaraithe thar ceann an allmhaireora, is iomchuí a fhoráil go sainráite gurb é an t-ionadaí custaim indíreach ba cheart a bheith faoi réir na n-oibleagáidí is infheidhme maidir leis an allmhaireoir sin de bhun an Rialacháin seo, go háirithe an oibleagáid dearbhú SCCT a chur isteach i ndáil leis na hearraí arna n-allmhairiú ag an ionadaí custaim indíreach sin thar ceann an allmhaireora sin, go dtabharfaidh sé deimhniú SCCT suas i ndáil le hastaíochtaí atá leabaithe sna hearraí sin. Mar thoradh air sin, i gcás neamhchomhlíontachta, ba cheart gurbh é an t-ionadaí custaim indíreach a bheadh faoi réir pionós. Níor cheart feidhm a bheith aige sin, áfach, i gcás nár chomhaontaigh ionadaí custaim indíreach, a ghníomhaíonn thar ceann allmhaireoir atá bunaithe i mBallstát, gníomhú mar dhearbhoir SCCT údaraithe.
- (7) Bunaithe ar fhaisnéis chustaim, ba cheart don Choimisiún faireachán a dhéanamh ar chainníochtaí na n-earraí a allmhairítear chun measúnú a dhéanamh ar chomhlíonadh na tairisí. Ba cheart do na húdaráis inniúla a bheith in ann an faireachán sin a dhéanamh freisin. Ionas go mbeidh na húdaráis inniúla in ann cinneadh feasach a dhéanamh, is gá foráil a dhéanamh maidir le socruithe iomchuí chun an fhaisnéis agus na sonraí is gá a bheith ar fáil do na húdaráis inniúla. Ba cheart don údarás inniúil a bheith in ann an fhaisnéis agus an fhianaise is gá a iarraidh ar údaráis chustaim, lena n-áirítear ainm, seoladh agus faisnéis teagmhála allmhaireoirí, i gcás nach bhfuil an fhaisnéis sin ar fáil don údarás inniúil ar shlí eile. I gcás ina bhfaighidh na húdaráis chustaim amach gur sháraigh allmhaireoir an tairseach, lena n-áirítear ar bhonn teachtaireacht ón údarás inniúil, níor cheart dóibh allmhairiú breise earraí ón allmhaireoir sin go dtí deireadh na bliana féilire ábhartha a cheadú, nó go dtí go mbeidh stádas dearbhóra SCCT údaraithe faighte ag an allmhaireoir sin.

- (8) Maidir le hallmhaireoir atá ag súil leis go sáróidh sé an tairseach bhliantúil, ba cheart dó iarratas a dhéanamh ar údarú de bhun Airteagal 5 de Rialachán (AE) 2023/956 go tráthúil agus meastar go bhfaighidh sé stádas dearbhóra SCCT údaráithe, mar riail, sula sárófar an tairseach mhais-bhunaithe aonair. I gcás allmhaireoirí nár deonaíodh an t-údarú dóibh sular sháraigh siad an tairseach, ba cheart feidhm a bheith ag pionóis maidir leis na hearraí allmhairithe ina n-iomláine i gcomhréir le hAirteagal 26(2a) de Rialachán (AE) 2023/956. Ba cheart an t-allmhaireoir a scaoileadh ón oibleagáid dearbhú SCCT a thíolacadh agus deimhnithe SCCT a thabhairt suas nuair a bheidh an pionós íoctha aige i gcomhréir le hAirteagal 26(2a) den Rialachán sin.
- (8a) D'fhéadfadh sé go gcuirfí isteach líon ard iarratas ag tús 2026 mar thoradh ar an oibleagáid stádas dearbhóra SCCT údaráithe a fháil sula sárófar an tairseach mhais-bhunaithe aonair. Chun teacht isteach rianúil sa tréimhse chinntitheach a éascú, agus chun cur isteach féideartha ar allmhairí a sheachaint, is iomchuí cead a thabhairt d'allmhaireoirí agus ionadaithe custam indíreach a chuir iarratas isteach go cuí i gcomhréir leis an Rialachán seo faoin 31 Márta 2026 leanúint de na hearraí a allmhairiú in 2026 fiú tar éis dóibh an tairseach a shárú go dtí go ndéanfar an cinneadh maidir leis an údarú a dheonú. Chun nach dtiocfar timpeall ar na hoibleagáidí faoin Rialachán seo, i gcás ina ndiúltaítear an t-údarú a dheonú, ba cheart na hallmhaireoirí agus ionadaithe custam indíreach a bheith faoi réir pionós i gcomhréir le hAirteagal 26(2a).
- (9) Chun a áirithiú go gcumhdófar leis an sainmhíniú ar allmhaireoir na nósanna imeachta custaim ábhartha uile, is gá é a leasú chun cás an nós imeachta custaim simplithe a chur san áireamh i gcás nach dtíolactar ach bille urscaoilte de bhun Airteagal 175(5) de Rialachán Tarmligthe (AE) 2015/2446 ón gCoimisiún¹¹.

¹¹ Rialachán Tarmligthe (AE) 2015/2446 ón gCoimisiún an 28 Iúil 2015 lena bhforlíontar Rialachán (AE) Uimh. 952/2013 ó Pharlaimint na hEorpa agus ón gComhairle a mhéid a bhaineann le rialacha mionsonraithe maidir le forálacha áirithe Chód Custaim an Aontais (IO L 343, 29.12.2015, lch. 1, ELI: http://data.europa.eu/eli/reg_del/2015/2446/oj).

- (10) Chun cothromaíocht a bhaint amach idir éifeachtacht an nós imeachta údarúcháin agus próifíl riosca na n-iarratasóirí, ba cheart an nós imeachta comhairliúcháin a bheith roghnach don údarás inniúil. Leis an nós imeachta comhairliúcháin, ba cheart an t-údarás inniúil a bheith in ann dul i gcomhairle le húdaráis inniúla eile agus leis an gCoimisiún nuair a mheastar gur gá sin ar bhonn na faisnéise arna tíolacadh ag an iarratasóir agus ar bhonn na faisnéise custaim a chuirtear ar fáil i gclárann SCCT.
- (11) Chun solúbthacht bhreise a sholáthar, ba cheart na dearbhóirí SCCT údaráithe a bheith in ann tíolacadh an dearbhaithe SCCT a tharmligean chuig tríú páirtí. Ba cheart an dearbhóir SCCT údaráithe a bheith freagrach i gcónaí as tíolacadh an dearbhaithe SCCT. Chun an tarmligean agus an rochtain is gá a sholáthar, ba cheart don tríú páirtí sin dintiúir theicniúla áirithe a chomhlíonadh, lena n-áirítear uimhir um Chlárú agus Sainaithint Oibreoirí Eacnamaíocha (uimhir EORI) a bheith aige agus é a bheith bunaithe i mBallstát.
- (12) Ceanglaítear ar dhearbhoirí SCCT údaráithe a ndearbhú SCCT bliantúil a thíolacadh agus an líon comhfhreagrach deimhnithe a thabhairt suas faoin 31 Bealtaine den bhliain tar éis bhliain an allmhairithe. Chun solúbthacht a thabhairt do dhearbhoirí SCCT údaráithe chun a n-oibleagáidí a chomhlíonadh, le dáta tíolactha níos déanaí thabharfaí níos mó ama do dhearbhoirí SCCT údaráithe an fhaisnéis is gá a bhailiú, a áirithiú go ndéanfaidh fíoraitheoir creidiúnaithe astaíochtaí leabaithe a fhíorú, agus an líon comhfhreagrach deimhnithe SCCT a cheannach. Ba cheart an dáta maidir le cur ar ceal deimhnithe SCCT a choigeartú dá réir.

- (13) I gcás astaíochtaí leabaithe roinnt earraí alúmanaim agus cruach a áirítear faoi raon feidhme SCCT faoi láthair, is iad astaíochtaí leabaithe ábhar ionchuir (réamhtheachtaithe) go príomha a chinneann na hastaíochtaí sin, agus bíonn na hastaíochtaí a eascraíonn le linn chéimeanna táirgthe na n-earraí sin réasúnta íseal de ghnáth. Is éard atá sna céimeanna sin próisis bhailchríche a dhéanann suiteálacha ar leithligh nach gcumhdaítear le córas trádála astaíochtaí an Aontais Eorpaigh ('CTA AE') dá bhforáiltear i dTreoir 2003/87/CE ó Pharlaimint na hEorpa agus ón gComhairle¹², seachas i gcás saoráidí comhtháite. Ba cheart astaíochtaí leabaithe na bpróiseas táirgthe sin a eisiáil ó theorainneacha córais ríomh na n-astaíochtaí.
- (13a) Maidir le leictreachas a ghintear i limistéar eacnamaíoch eisiach nó ar scairbh ilchríochach Ballstáit nó tríú tír, ba cheart a mheas gur de thionscnamh an Bhallstáit sin nó an tríú tír sin é, de réir analaí leis an bhforáil in Airteagal 31(h) de Rialachán Tarmligthe (AE) 2015/2446 ón gCoimisiún. Ba cheart feidhm a bheith ag an méid céanna maidir le hidrigin a mheastar, de réir na rialacha maidir le tionscnamh neamhfhabhair, agus go háirithe Airteagail 31 agus 32 de Rialachán Tarmligthe (AE) 2015/2446 ón gCoimisiún, a bheith de thionscnamh limistéar eacnamaíoch eisiach nó scairbh ilchríochach Ballstáit nó tríú tír.
- (14) I gcás ina raibh ábhair ionchuir (réamhtheachtaithe) faoi réir CTA AE cheana féin nó faoi réir córas praghsála carbóin atá nasctha go hiomlán le CTA AE, níor cheart astaíochtaí leabaithe na réamhtheachtaithe sin a chur san áireamh agus astaíochtaí leabaithe earraí casta á ríomh.

¹² Treoir 2003/87/CE ó Pharlaimint na hEorpa agus ón gComhairle an 13 Deireadh Fómhair 2003 lena mbunaítear córas maidir le trádáil lamháltas astaíochtaí gás ceaptha teasa laistigh den Aontas agus lena leasaítear Treoir 96/61/CE ón gComhairle (IO L 275, 25.10.2003, lch. 32, ELI: <http://data.europa.eu/eli/dir/2003/87/oj>).

- (15) Ceanglaítear ar dhearbhoirí SCCT údaraithe dearbhú SCCT bliantúil a thíolacadh ina mbeidh ríomh na n-astaíochtaí leabaithe ar bhonn luachanna réamhshocraithe nó luachanna iarbhír arna bhfíorú ag fíoraitheoirí creidiúnaithe. Déanfaidh an Coimisiún luachanna réamhshocraithe a ríomh agus a chur ar fáil. Dá bhrí sin, níor cheart feidhm a bheith ag fíorú astaíochtaí leabaithe ach amháin maidir le luachanna iarbhír.
- (16) Is léiriú í an fhaisnéis a bailíodh le linn na hidirthréimhse ar dheacrachtaí do dhearbhoirí tuairiscithe an fhaisnéis is gá a fháil maidir leis an bpraghas carbóin a íocadh iarbhír i dtríú tír. Chun asbhaint an phraghais carbóin a éascú, ba cheart don Choimisiún, i gcás inar féidir, meánphraghas carbóin bliantúil a bhunú arna shloinneadh in EUR/tCO_{2e} den phraghas carbóin a íocadh iarbhír, bunaithe ar na sonraí is fearr atá ar fáil ó fhaisnéis iontaofa atá ar fáil go poiblí agus ó fhaisnéis arna soláthar ag tríú tíortha, lena n-áirítear faisnéis arna soláthar ar bhonn coimeádach.
- (16a) An fhianaise is gá chun praghas carbóin a íocadh go héifeachtach a asbhaint, braitheann sí ar ghnéithe atá ábhartha chun na hastaíochtaí leabaithe iarbhír a chinneadh agus a fhíorú. I gcás ina ndearbhaítear na hastaíochtaí leabaithe ar bhonn luachanna réamhshocraithe, níor cheart é a bheith indéanta asbhaint an phraghais carbóin a éileamh ach amháin trí thagairt a dhéanamh do phraghsanna carbóin réamhshocraithe bliantúla, i gcás ina mbeadh siad ar fáil. Thairis sin, ós rud é nár cheart astaíochtaí leabaithe réamhtheachtaithe a chur san áireamh i gcás ina raibh siad faoi réir CTA AE cheana, nó faoi réir córas praghsála carbóin atá nasctha go hiomlán le CTA AE, níl an praghas carbóin a bhaineann leis na hastaíochtaí leabaithe sin ábhartha don asbhaint.

- (17) Féadfaidh dearbhóirí SCCT údaráithe laghdú a éileamh ar an líon deimhnithe SCCT atá le tabhairt suas, laghdú a chomhfhreagraíonn don phraghas carbóin a íocadh iarbhir sa tír thionscnaimh le haghaidh na n-astaíochtaí leabaithe dearbhaithe. Ós rud é go bhféadfar an praghas carbóin a íoc i dtríú tír seachas tír thionscnaimh na n-earraí allmhairithe, ba cheart an praghas carbóin sin a bheith incháilithe d'asbhaint freisin.
- (18) Chun iontaofacht na sonraí astaíochtaí atá i gclárlann SCCT a fheabhsú agus chun tíolacadh sonraí a éascú, ba cheart cead a bheith ag fíoraitheoirí creidiúnaithe rochtain a fháil ar chlárlann SCCT chun na hastaíochtaí leabaithe a fhíorú arna iarraidh sin d'oibreoir i dtríú tíortha. Ina theannta sin, ba cheart cead a bheith ag máthairchuideachtaí nó gnóthais ghaolmhara na n-oibreoirí sin rochtain a fháil ar chlárlann SCCT chun sonraí ábhartha a chlárú agus a chomhroinnt thar ceann an oibreora atá faoi rialú. Ba cheart ceangal a chur ar na hoibreoirí cláruimhir chorparáideach nó ghníomhaíochta a sholáthar chun a sainaitheint a áirithiú.
- (18a) Chun comhsheasmhacht le Rialachán 765/2008¹³, chomh maith le Rialachán Cur Chun Feidhme (AE) 2018/2067 ón gCoimisiún¹⁴, a áirithiú, is iomchuí foráil a dhéanamh gur cheart fíoraitheoir a bheith ina dhuine dlítheanach atá creidiúnaithe chun críche Rialachán (AE) 2023/956 le cinneadh ó chomhlacht náisiúnta creidiúnaithe. Chun na críche sin, ba cheart don chomhlacht náisiúnta creidiúnaithe na grúpaí ábhartha gníomhaíochtaí faoi Rialachán Cur Chun Feidhme (AE) 2018/2067 a chur san áireamh chun measúnú a dhéanamh ar cháilíochtaí an duine dhlítheanaigh.

¹³ Rialachán (CE) Uimh. 765/2008 ó Pharlaimint na hEorpa agus ón gComhairle an 9 Iúil 2008 lena leagtar amach na ceanglais maidir le creidiúnú agus maidir le faireachas margaidh a bhaineann le táirgí a mhargú, agus lena n-aisghairtear Rialachán (CEE) Uimh. 339/93 (IO L 218, 13.8.2008, lch. 30).

¹⁴ Rialachán Cur Chun Feidhme (AE) 2018/2067 ón gCoimisiún an 19 Nollaig 2018 maidir le fíorú sonraí agus maidir le creidiúnú fíoraitheoirí de bhun Threoir 2003/87/CE ó Pharlaimint na hEorpa agus ón gComhairle (IO L 334, 31.12.2018, lch. 94).

- (19) Chun cur chun feidhme Rialachán (AE) 2023/956 a chothú ar an leibhéal náisiúnta, ba cheart do na Ballstáit a áirithiú go mbeidh na cumhachtaí uile is gá ag na húdaráis inniúla chun a bhfeidhmeanna agus a ndualgais a chomhlíonadh.
- (19a) Is iomchuí foráil a dhéanamh gur cheart na costais arna dtabhú i dtaca le bunú, oibriú agus bainistiú an ardáin lárnaigh choitinn a mhaoiniú le táillí is iníoctha ag dearbhóir SCCT údaraithe. Ba cheart na costais sin a íoc ar dtús as buiséad ginearálta an Aontais agus, chuige sin, ba cheart an t-ioncam a ghintear leis na táillí sin a shannadh do bhuiséad an Aontais chun na costais ábhartha a chumhdach. I bhfianaise chineál na n-ioncam, is iomchuí caitheamh leis an ioncam mar ioncam sannta inmheánach. Aon ioncam a bheidh fágtha tar éis na costais sin a ghlanadh, ba cheart é a shannadh do bhuiséad an Aontais. Ba cheart an chumhacht a thabhairt don Choimisiún struchtúr agus leibhéal na dtáillí a chinneadh, trí bhíthin gníomhartha tarmligthe, ionas go mbeidh eagrú agus úsáid an ardáin lárnaigh choitinn costéifeachtúil, go socrófar na táillí chun na costais ábhartha a chumhdach go docht agus go seachnófar costais riaracháin mhíchuí. Ba cheart an chumhacht a thabhairt don Choimisiún freisin cinneadh a dhéanamh, trí bhíthin gníomhartha tarmligthe, tráth nósanna imeachta soláthair chomhpháirtigh ina dhiaidh sin gur cheart go maoineofaí go díreach leis na táillí na costais a bhaineann le hoibriú agus bainistiú an ardáin.
- (20) Chun a ndóthain ama a thabhairt do dhearbhoirí SCCT údaraithe ullmhú le haghaidh chomhlíonadh na n-oibleagáidí leasaithe faoi Rialachán (AE) 2023/956, ba cheart do na Ballstáit tús a chur le deimhnithe SCCT a dhíol in 2027 le haghaidh astaíochtaí atá leabaithe in earraí a allmhaireofar le linn na bliana 2026. Maidir le praghas na ndeimhnithe SCCT, a cheannófar in 2027 agus a chomhfhreagróidh d'astaíochtaí atá leabaithe in earraí a allmhaireofar isteach san Aontas in 2026, ba cheart é a bheith ina léiriú ar phraghsanna lamháltais CTA AE in 2026.

- (21) Maidir leis an oibleagáid atá ar na dearbhóirí SCCT údaraithe a áirithiú go gcomhfhreagraíonn an líon deimhnithe SCCT ar a gcuntas i gclárlann SCCT ag deireadh gach ráithe do 80 % ar a laghad de na hastaíochtaí leabaithe sna hearraí atá allmhairithe acu ó thús na bliana, is oibleagáid í nach bhfuil curtha in oiriúint a dhóthain don choigeartú airgeadais a bhfuil coinne leis. Is gá, dá bhrí sin, an cóimheas a laghdú ó 80 % go 50 % agus leithdháileadh saor in aisce lamháltais CTA AE a chomhtháthú. Thairis sin, ba cheart an dearbhóir SCCT údaraithe a bheith in ann brath ar an bhfaisnéis a thíolactar sa dearbhú SCCT sa bhliain roimhe sin, le haghaidh na n-earraí céanna agus na dtríú tíortha céanna.
- (22) Ar an gcaoi chéanna, ba cheart an teorainn athcheannaigh a ailíniú ar bhealach níos cruinne leis an líon deimhnithe SCCT a cheanglaítear ar na dearbhóirí SCCT údaraithe a cheannach le linn bhliain an allmhairithe.
- (23) Ós rud é go gcuirtear deimhnithe SCCT ar ceal gan aon chúiteamh, ní gá faisnéis a mhalartú ón ardán lárnach coiteann chuig clárlann SCCT ag deireadh an lae oibre.
- (24) I gcás ina mainníonn an dearbhóir SCCT údaraithe an líon ceart deimhnithe SCCT a thabhairt suas mar thoradh ar fhaisnéis mhícheart arna soláthar ag tríú páirtí, eadhon an t-oibreoir, an fíoraitheoir nó an duine neamhspleách a dheimhníonn doiciméadacht an phraghais carbóin, ba cheart do na húdaráis inniúla, agus pionóis á gcur i bhfeidhm acu, a bheith in ann na himthosca sonracha a chur san áireamh mar atá fad, tromchúis, raon feidhme, cineál d'aon ghnó nó faillíoch agus athdhéanamh an neamhchomhlíonta agus leibhéal comhair an dearbhóra SCCT údaraithe. D'fhágfadh sé sin go bhféadfaí méid an phionóis a laghdú i gcás ina ndéanfaí mionearráidí nó earráidí neamhbheartaithe.

- (24a) Ba cheart allmhaireoirí seachas dearbhóirí SCCT údaraithe a sháraigh an tairseach mhais-bhunaithe aonair a bheith faoi réir an phionóis dá bhforáiltear in Airteagal 26(2). Chun na críche sin, ba cheart iomlán na n-astaíochtaí atá leabaithe sna hearraí arna n-allmhairiú ag an allmhaireoir sin gan údarú sa bhliain féilire ábhartha a chur san áireamh. Is iomchuí foráil a dhéanamh go scaoilfidh íocaíocht an phionóis an t-allmhaireoir ón oibleagáid dearbhú SCCT a chur isteach agus deimhnithe SCCT a thabhairt suas i leith na n-allmhairí sin. Chun mionchineál nó sárú neamhbheartaithe a chur san áireamh, ba cheart do na húdaráis inniúla a bheith in ann pionós níos ísle a fhorchur i gcás nár sáraíodh an tairseach mhais-bhunaithe aonair le níos mó ná 10 % den tairseach sin nó i gcás inar lean an t-oibreoir go sealadach de bheith ag allmhairiú earraí i gcomhréir le hAirteagal 17(7a) agus i gcás inar diúltaíodh dá iarratas ar stádas dearbhóra SCCT údaraithe.
- (25) Tá feidhm ag SCCT maidir le hearraí áirithe atá dian ar charbón agus a allmhairítear isteach san Aontas. Áirítear ‘créanna caoilíneacha eile’ ar liosta na n-earraí SCCT in Iarscríbhinn I a ghabhann le Rialachán (AE) 2023/956 ar an liosta d’earraí stroighne. Cé gur táirgí atá dian ar charbón iad créanna caoilíneacha cailcínithe, ní hamhlaidh atá i gcás créanna caoilíneacha neamhchailcínithe. Dá bhrí sin, ba cheart créanna caoilíneacha neamhchailcínithe a eisiamh ó raon feidhme SCCT.
- (26) Liostaítear in Iarscríbhinn II a ghabhann le Rialachán (AE) 2023/956 na hearraí nár cheart ach astaíochtaí díreacha a chur san áireamh ina leith agus astaíochtaí leabaithe á ríomh. I gcás na n-earraí nach liostaítear san Iarscríbhinn sin, ba cheart idir astaíochtaí díreacha agus astaíochtaí indíreacha a chur san áireamh. Ós rud é nach bhfuil astaíochtaí indíreacha ábhartha i gcás giniúint leictreachais, ba cheart leictreachas a chur le liosta na n-earraí san Iarscríbhinn sin.

- (27) Is gá freisin simpliú a dhéanamh ar na modhanna chun luachanna réamhshocraithe a chinneadh i gcás nach mbeadh sonraí iontaofa maidir leis an tír onnmhairiúcháin ar fáil le haghaidh cineál áirithe earraí. Sna cásanna sin, chun sceitheadh carbóin a chosc, ba cheart an luach réamhshocraithe a shocrú ar leibhéal mheándéine astaíochtaí na ndeich dtír onnmhairiúcháin a bhfuil an déine astaíochtaí is airde acu agus a bhfuil sonraí iontaofa ar fáil ina leith, ar meán iomchuí é chun cuspóir comhshaoil SCCT a áirithiú. Tá an méid sin gan dochar don fhéidearthacht na luachanna réamhshocraithe sin a oiriúnú bunaithe ar ghnéithe réigiún-sonracha de bhun phointe 7 d'Iarscríbhinn IV a ghabhann leis an Rialachán maidir le SCCT.
- (28) Chun leasú a dhéanamh ar ghnéithe áirithe neamhriachtanacha de Rialachán (AE) 2023/956, ba cheart an chumhacht chun gníomhartha a ghlacadh i gcomhréir le hAirteagal 290 den Chonradh ar Fheidhmiú an Aontais Eorpaigh a tharmligean chuig an gCoimisiún i leith leasú a dhéanamh ar an tairseach in Iarscríbhinn VII a ghabhann leis an Rialachán sin, i gcás inar gá, mar a chinntear i gcomhréir le hAirteagal 2(3a) den Rialachán sin. Tá sé tábhachtach, go háirithe, go rachadh an Coimisiún i mbun comhairliúcháin iomchuí le linn a chuid oibre ullmhúcháin, lena n-áirítear ar leibhéal na saineolaithe, agus go ndéanfaí na comhairliúcháin sin i gcomhréir leis na prionsabail a leagtar síos i gComhaontú Idirinstitiúideach an 13 Aibreán 2016 maidir le Reachtóireacht Níos Fearr*. Go sonrach, chun rannpháirtíocht chomhionann in ullmhú na ngníomhartha tarmligthe a áirithiú, faigheann Parlaimint na hEorpa agus an Chomhairle na doiciméid uile ag an am céanna leis na saineolaithe sna Ballstáit, agus bíonn rochtain chórasach ag a gcuid saineolaithe ar chruinnithe ghrúpaí saineolaithe an Choimisiúin a bhíonn ag déileáil le hullmhú na ngníomhartha tarmligthe.

* Comhaontú Idirinstitiúideach idir Parlaimint na hEorpa, Comhairle an Aontais Eorpaigh agus an Coimisiún Eorpach maidir le

Reachtóireacht Níos Fearr, Comhaontú Idirinstitiúideach an 13 Aibreán 2016 maidir le Reachtóireacht Níos Fearr (IO L 123, 12.5.2016,

lgh. 1–14, ELI: http://data.europa.eu/eli/agree_interinstit/2016/512/oj

- (29) Maidir le cuspóirí an Rialacháin seo, is é sin oibleagáidí áirithe a shimpliú agus, i ndáil leis an sásra a ghlac an tAontas chun an riosca sceite carbóin a chosc agus, dá bhrí sin, astaíochtaí carbóin an domhain a laghdú, an sásra sin a neartú, ós rud é nach féidir leis na Ballstáit iad a ghnóthú go leormhaith ach gur fearr is féidir iad a ghnóthú ar leibhéal an Aontais de bharr fhairsinge nó éifeachtaí na gníomhaíochta, féadfaidh an tAontas bearta a ghlacadh, i gcomhréir le prionsabal na coimhdeachta a leagtar amach in Airteagal 5 den Chonradh ar an Aontas Eorpach. I gcomhréir le prionsabal na comhréireachta a leagtar amach san Airteagal sin, ní théann an Rialachán seo thar a bhfuil riachtanach chun na cuspóirí sin a ghnóthú.
- (30) Ba cheart, dá bhrí sin, Rialachán (AE) 2023/956 a leasú dá réir,

TAR ÉIS AN RIALACHÁN SEO A GHLACADH:

Airteagal 1

Leasuithe ar Rialachán (AE) 2023/956

Leasaítear Rialachán (AE) 2023/956 mar a leanas:

(1) Leasaítear Airteagal 2 mar a leanas:

(a) cuirtear an méid seo a leanas in ionad mhír 3:

‘3. De mhaolú ar mhíreanna 1 agus 2, ní bheidh feidhm ag an Rialachán seo maidir le hearraí atá le bogadh nó le húsáid i gcomhthéacs gníomhaíochtaí míleata de bhun Airteagal 1, pointe (49), de Rialachán Tarmligthe (AE) 2015/2446 ón gCoimisiún*.

*Rialachán Tarmligthe (AE) 2015/2446 ón gCoimisiún an 28 Iúil 2015 lena bhforlíontar Rialachán (AE)

Uimh. 952/2013 ó Pharlaimint na hEorpa agus ón gComhairle a mhéid a bhaineann le rialacha mionsonraithe

maidir le forálacha áirithe Chód Custaim an Aontais (IO L 343, 29.12.2015, lch. 1, ELI:

http://data.europa.eu/eli/reg_del/2015/2446/oj).’;

(b) [scriosta]

(1a) cuirtear an tAirteagal seo a leanas isteach:

‘Airteagal 2a

Díolúine de minimis

1. Beidh allmhaireoir, lena n-áirítear allmhaireoirí a bhfuil stádas dearbhóra SCCT údaráithe acu, díolmhaithe ó na hoibleagáidí faoin Rialachán seo, i gcás nach mó glanmhais na n-earraí allmhairithe i mbliain féilire ar leith go carnach ná an tairseach mhais-bhunaithe aonair a leagtar síos i bpointe 1 d'Iarscríbhinn VII. Beidh feidhm ag an tairseach sin maidir le glanmhais iomlán na n-earraí de na cóid AC uile a chomhiomlánaítear in aghaidh an allmhaireora agus in aghaidh na bliana féilire. An t-allmhaireoir sin, lena n-áirítear allmhaireoirí a bhfuil stádas dearbhóra SCCT údaráithe acu, dearbhóidh sé an díolúine sin sa dearbhú custaim ábhartha.
2. I gcás, laistigh den bhliain féilire ábhartha, ina sáraíonn allmhaireoir, lena n-áirítear allmhaireoirí a bhfuil stádas dearbhóra SCCT údaráithe acu, an tairseach mhais-bhunaithe aonair dá dtagraítear i mír 1, beidh an t-allmhaireoir sin nó an dearbhóir SCCT údaráithe sin faoi réir na n-oibleagáidí uile faoin Rialachán seo i leith na n-astaíochtaí uile atá leabaithe sna hearraí uile a allmhairíodh sa bhliain féilire ábhartha.

3. Faoin 30 Aibreán gach bliain féilire, déanfaidh an Coimisiún measúnú, ar bhonn na sonraí allmhairiúcháin do na 12 mhí féilire roimhe sin, i dtaobh cibé a áirithítear nó nach n-áirítear leis an tairseach mhais-bhunaithe aonair a leagtar amach i bpointe 1 d'Iarscríbhinn VII go bhfuil feidhm ag mír 1 den Airteagal seo maidir le méid nach mó ná 1 % de na hastaíochtaí atá leabaithe sna hearraí allmhairithe agus sna táirgí próiseáilte. Glacfaidh an Coimisiún gníomhartha tarmligthe chun an tairseach mhais-bhunaithe aonair a leagtar amach i bpointe 1 d'Iarscríbhinn VII a leasú trí úsáid a bhaint as an modheolaíocht a leagtar amach i bpointe 2 den Iarscríbhinn sin, i gcás ina n-imíonn luach na tairsí a thagann as sin níos mó ná 15 thona ón tairseach is infheidhme. Beidh feidhm ag an tairseach mhais-bhunaithe aonair leasaithe ó thús na bliana féilire dár gcionn.
4. Ní bheidh feidhm ag an Airteagal seo maidir le hallmhairí leictreachais agus hidrigine.

(2) Leasaítear Airteagal 3 mar a leanas:

(a) cuirtear an méid seo a leanas in ionad phointe (15):

‘(15) ciallaíonn ‘allmhaireoir’ an duine a thaisceann dearbhú custaim maidir le scaoileadh i saorchúrsaíocht earraí nó bille urscaoilte i gcomhréir le hAirteagal 175(5) de Rialachán Tarmligthe (AE) 2015/2446 ina ainm féin agus thar a cheann féin nó, i gcás ina dtaisceann ionadaí custaim indéireach an dearbhú custaim i gcomhréir le hAirteagal 18 de Rialachán (AE) Uimh. 952/2013, an duine a dtaisctear an dearbhú sin thar a cheann;

(b) cuirtear an méid seo a leanas in ionad phointe (31):

‘(31) ciallaíonn ‘oibreoir’ aon duine a oibríonn nó a rialaíonn suiteáil i dtríú tír, lena n-áirítear máthairchuideachta a rialaíonn suiteáil i dtríú tír;’;

(3) Leasaítear Airteagal 5 mar a leanas:

(a) cuirtear an méid seo a leanas in ionad mhír 1:

‘1. Aon allmhaireoir atá bunaithe i mBallstát, sula n-allmhaireoidh sé earraí i gcríoch chustaim an Aontais, déanfaidh sé iarratas ar stádas dearbhóra SCCT údaraithe (‘iarratas ar údarú’).

(aa) cuirtear an mhír 1aa seo a leanas isteach:

1aa. Gheobhaidh ionadaí indíreach custaim stádas dearbhóra SCCT údaraithe sula n-allmhaireoidh sé earraí i gcríoch chustaim an Aontais. Gníomhóidh ionadaí custaim indíreach mar dhearbhoir SCCT údaraithe i gcás ina gceapann allmhaireoir an t-ionadaí custaim indíreach i gcomhréir le hAirteagal 18 de Rialachán (AE) Uimh. 952/2013 agus ina dtoilíonn sé gníomhú mar dhearbhoir SCCT údaraithe, gan beann ar cé acu atá nó nach bhfuil an t-allmhaireoir díolmhaithe ó na hoibleagáidí faoin Rialachán seo de bhun Airteagal 2a.’;

(b) cuirtear an mhír 1a seo a leanas isteach:

‘1a. I gcás ina bhfuil feidhm ag Airteagal 2a, cuirfear an t-iarratas ar údarú isteach i gcásanna ina bhfuil coinne ag an allmhaireoir go sáróidh sé an tairseach mhais-bhunaithe aonair dá dtagraítear san Airteagal sin.’;

(c) cuirtear an méid seo a leanas in ionad mhír 2:

‘2. I gcás nach bhfuil allmhaireoir bunaithe i mBallstát, gheobhaidh an t-ionadaí custaim indíreach stádas dearbhóra SCCT údaraithe, gan beann ar cé acu atá nó nach bhfuil an t-allmhaireoir díolmhaithe ó na hoibleagáidí faoin Rialachán seo de bhun Airteagal 2a.’;

(ca) cuirtear isteach an mhír seo a leanas:

‘2a. I gcás ina ngníomhaíonn ionadaí indíreach custaim mar dhearbhoir SCCT údaráithe thar ceann allmhaireora, beidh an t-ionadaí custaim indíreach sin faoi réir na n-oibleagáidí is infheidhme maidir leis an allmhaireoir sin de bhun an Rialacháin seo, i ndáil leis na hearraí a d’allmhairigh an t-ionadaí custaim indíreach sin thar ceann an allmhaireora sin.’;

(d) leasaítear mír 5 mar a leanas:

(i) cuirtear an méid seo a leanas in ionad phointe (g):

‘(g) luach measta agus méid measta allmhairí earraí isteach i gcríoch chustaim an Aontais de réir chineál na n-earraí agus na faisnéise maidir leis na Ballstáit allmhairiúcháin, le haghaidh na bliana féilire ina dtíolactar an t-iarratas, agus le haghaidh na bliana féilire dár gcionn;’;

(ii) cuirtear an pointe seo a leanas isteach:

‘(ga) líon an deimhnithe oibreora eacnamaíoch údaráithe (AEO), má dheonaítear é, i gcomhréir le hAirteagal 38 de Rialachán (AE) Uimh. 952/2013;’;

(e) cuirtear an mhír 7a seo a leanas isteach:

‘7a. Féadfaidh dearbhóir SCCT údaraithe tíolacadh dearbhuithe SCCT dá dtagraítear in Airteagal 6 a tharmligean chuig duine atá ag gníomhú thar ceann agus in ainm an dearbhóra sin. Is é an dearbhóir SCCT údaraithe a bheidh freagrach i gcónaí as na hoibleagáidí is infheidhme maidir le dearbhóirí SCCT údaraithe faoin Rialachán seo a chomhlíonadh.’;

(4) Leasaítear Airteagal 6 mar a leanas:

(a) cuirtear an méid seo a leanas in ionad mhír 1:

‘1. Faoin 30 Meán Fómhair gach bliain, agus den chéad uair in 2027 don bhliain 2026, bainfidh gach dearbhóir SCCT údaraithe úsáid as an gclárann SCCT dá dtagraítear in Airteagal 14 chun dearbhú SCCT a thíolacadh le haghaidh na bliana féilire roimhe sin.’

(b) cuirtear an méid seo a leanas in ionad mhír 2:

2. Beidh an fhaisnéis seo a leanas sa dearbhú SCCT:

- (a) cainníocht iomlán gach cineáil earraí a allmhairíodh le linn na bliana féile roimhe sin, arna sloinneadh i meigeavatuairanta i gcás leictreachais agus i dtónaí i gcás earraí eile, lena n-áirítear na hearraí allmhairithe faoi bhun na tairsí a leagtar síos i bpointe 1 d'Iarscríbhinn VII);
- (b) iomlán na n-astaíochtaí leabaithe sna hearraí dá dtagraítear i bpointe (a) den mhír seo, arna shloinneadh i dtónaí d'astaíochtaí CO₂e in aghaidh na meigeavatuair leictreachais nó, i gcás earraí eile, i dtónaí d'astaíochtaí CO₂e in aghaidh an tona de gach cineál earraí, arna ríomh i gcomhréir le hAirteagal 7 agus arna bhfíorú, i gcás ina gcinntear na hastaíochtaí leabaithe ar bhonn na n-astaíochtaí iarbhír, i gcomhréir le hAirteagal 8;
- (c) an líon iomlán deimhnithe SCCT a chomhfhreagraíonn d'iomlán na n-astaíochtaí leabaithe dá dtagraítear i bpointe (b) den mhír seo, atá le tabhairt suas, tar éis an laghdaithe atá dlite mar gheall ar an bpraghas carbóin a íocadh i dtríú tír i gcomhréir le hAirteagal 9 agus an coigeartú is gá chun an méid a leithdháiltear lamháltais CTA AE saor in aisce i gcomhréir le hAirteagal 31 a léiriú;
- (d) i gcás inarb infheidhme, cóipeanna de thuarascálacha fíorúcháin a d'eisigh fíoraitheoirí creidiúnaithe faoi Airteagal 8 agus Iarscríbhinn VI.';

(c) cuirtear an méid seo a leanas in ionad mhír 6:

‘6. Cumhachtaítear don Choimisiún gníomhartha cur chun feidhme a ghlacadh a bhaineann le formáid chaighdeánach an dearbhaithe SCCT, lena n-áirítear faisnéis mhionsonraithe maidir le gach suiteáil agus tír thionscnaimh nó tríú tír eile agus cineál na n-earraí atá le tuairisciú a thacaíonn leis na hiomláin dá dtagraítear i mír 2 den Airteagal seo, go háirithe a mhéid a bhaineann le hastaíochtaí leabaithe, an praghas carbóin a íocadh, an praghas carbóin réamhshocraithe chun críoch Airteagal 9(3a), an nós imeachta chun an dearbhú SCCT a thíolacadh trí chlárann SCCT, agus na socruithe chun deimhnithe SCCT dá dtagraítear i mír 2, pointe (c), den Airteagal seo, a thabhairt suas, i gcomhréir le hAirteagal 22(1), go háirithe maidir leis an bpróiseas agus maidir le roghnú na ndeimhnithe SCCT atá le tabhairt suas ag an dearbhóir SCCT údaráithe. Déanfar na gníomhartha cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 29(2).’;

(5) Leasaítear Airteagal 7 mar a leanas:

(-a) cuirtear an méid seo a leanas in ionad mhír 2:

‘2. Déanfar astaíochtaí leabaithe in earraí seachas leictreachas a chinneadh:

(a) bunaithe ar na hastaíochtaí iarbhir i gcomhréir leis na modhanna a leagtar amach i bpointí 2 agus 3 d’Iarscríbhinn IV, nó

(b) trí thagairt do luachanna réamhshocráithe i gcomhréir leis na modhanna a leagtar amach i bpointe 4.1 d’Iarscríbhinn IV.’;

(a) cuirtear an méid seo a leanas in ionad mhír 5:

‘5. Coimeádfaidh an dearbhóir SCCT údaraithe taifid den fhaisnéis atá de dhíth chun na hastaíochtaí leabaithe a ríomh i gcomhréir leis na ceanglais a leagtar síos in Iarscríbhinn V. Beidh na taifid sin mionsonraithe a ndóthain chun cur ar a gcumas d’fhíoraítheoirí atá creidiúnaithe de bhun Airteagal 18, i gcás inarb infheidhme, na hastaíochtaí leabaithe a fhíorú i gcomhréir le hAirteagal 8 agus le hIarscríbhinn VI agus chun cur ar a chumas don Choimisiún agus don údarás inniúil an dearbhú SCCT a athbhreithniú i gcomhréir le hAirteagal 19(2).’;

(b) i mír 7, cuirtear an méid seo a leanas in ionad phointe (a):

‘(a) cur i bhfeidhm na ngnéithe de na modhanna ríofa a leagtar amach in Iarscríbhinn IV, lena n-áirítear teorainneacha córais próiseas táirgthe a chinneadh, rud ba cheart a bheith ailínithe leis na próisis a chumhdaítear le CTA AE, agus ábhair ionchuir ábhartha (réamhtheachtaithe), fachtóirí astaíochta, luachanna suiteáil-sonracha astaíochtaí iarbhír agus luachanna réamhshocraithe agus a gcur i bhfeidhm faoi seach maidir le hearraí aonair, mar aon le modhanna a leagan síos chun iontaofacht na sonraí a áirithiú ar sonraí iad a gcinnfear na luachanna réamhshocraithe ar a mbonn, lena n-áirítear leibhéal mionsonraithe na sonraí, agus lena n-áirítear sonrú breise ar earraí a mheasfar gur ‘earraí simplí’ agus ‘earraí casta’ iad chun críoch phointe 1 d’Iarscríbhinn IV. Sonrófar sna gníomhartha cur chun feidhme sin freisin na gnéithe d’fhianaise lena léirítear go gcomhlíontar na critéir is gá chun údar a thabhairt le húsáid astaíochtaí iarbhír le haghaidh leictreachais agus an leictreachais arna thomhailt i bpróisis táirgthe earraí chun críoch mhíreanna 2, 3 agus 4 a liostaítear i bpointí 5 agus 6 d’Iarscríbhinn IV; agus’;

(6) in Airteagal 8, cuirtear an méid seo a leanas in ionad mhír 1:

‘1. I gcás ina gcinnfear astaíochtaí leabaithe ar bhonn astaíochtaí iarbhír, áiritheoidh an dearbhóir SCCT údaráithe go ndéanfaidh fíoraitheoir atá creidiúnaithe de bhun Airteagal 18 iomlán na n-astaíochtaí leabaithe a dearbhaíodh sa dearbhú SCCT arna thíolacadh de bhun Airteagal 6 a fhíorú, bunaithe ar na prionsabail fíorúcháin a leagtar amach in Iarscríbhinn VI.’;

(7) Cuirtear an méid seo a leanas in ionad Airteagal 9:

‘Airteagal 9

Praghas carbóin a íocadh i dtríú tír

1. I gcás ina gcinnfear astaíochtaí leabaithe ar bhonn astaíochtaí iarbhír, féadfaidh dearbhóir SCCT údaraithe éileamh a dhéanamh sa dearbhú SCCT ar laghdú ar an líon deimhnithe SCCT atá le tabhairt suas chun an praghas carbóin a íocadh sa tríú tír le haghaidh na n-astaíochtaí leabaithe dearbhaithe a chur san áireamh. Ní fhéadfar an laghdú a éileamh ach amháin má íocadh an praghas carbóin iarbhír i dtríú tír. Sa chás sin, cuirfear san áireamh aon lacáiste nó aon chineál eile cúitimh atá ar fáil sa tír sin agus a mbeadh laghdú ar an bpraghas carbóin sin mar thoradh air.
2. Coinneoidh an dearbhóir SCCT údaraithe taifid den doiciméadacht is gá chun a léiriú go raibh na hastaíochtaí leabaithe dearbhaithe faoi réir praghas carbóin i dtríú tír a íocadh iarbhír amhail dá dtagraítear i mír 1. Coinneoidh an dearbhóir SCCT údaraithe, go háirithe, fianaise a bhaineann le haon lacáiste nó le haon chineál cúitimh eile atá ar fáil, go háirithe na tagairtí do reachtaíocht ábhartha na tíre sin. Déanfaidh duine atá neamhspleách ar an dearbhóir SCCT údaraithe agus ar údaráis an tríú tír an fhaisnéis sa doiciméadacht sin a dheimhniú. Beidh ainm agus sonraí teagmhála an duine neamhspleách sin le feiceáil ar an doiciméadacht. Coinneoidh an dearbhóir SCCT údaraithe fianaise ar íocaíocht iarbhír an phraghais carbóin freisin.

3. Coimeádfaidh an dearbhóir SCCT údaráithe na taifid dá dtagraítear i mír 2, go dtí deireadh an cheathrú bliain i ndiaidh na bliana ar lena linn a tíolacadh an dearbhú SCCT nó inar cheart an dearbhú SCCT a thíolacadh.
- 3a. De mhaolú ar mhíreanna 1, 2 agus 3, nó i gcás ina gcinntear na hastaíochtaí leabaithe ar bhonn luachanna réamhshocraithe, féadfaidh dearbhóir SCCT údaráithe éileamh a dhéanamh, sa dearbhú SCCT, ar laghdú ar líon na ndeimhnithe SCCT atá le tabhairt suas chun an praghas carbóin a íocadh as na hastaíochtaí leabaithe dearbhaithe a chur san áireamh, faoi threoir praghsanna carbóin réamhshocraithe bliantúla. Sa chás sin, cuirfear san áireamh aon lacáiste nó aon chineál eile cúitimh atá ar fáil sa tír sin agus a mbeadh laghdú ar an bpraghas carbóin réamhshocraithe sin mar thoradh air. Ní fhéadfar an laghdú a éileamh ach amháin i gcás inar socraíodh praghas carbóin leis na rialacha is infheidhme sa tríú tír agus inar féidir praghas carbóin réamhshocraithe bliantúil a chinneadh le haghaidh an tríú tír sin, lena n-áirítear é sin a dhéanamh ar bhonn coimeádach.

Ó 2027 ar aghaidh, féadfaidh an Coimisiún, i gcás tríú tíortha ina bhfuil rialacha praghsála carbóin i bhfeidhm, an mhodheolaíocht a chinneadh, a fhoilsiú agus na praghsanna carbóin réamhshocraithe do na tríú tíortha sin a chur ar fáil i gclárlann SCCT dá dtagraítear in Airteagal 14. Chun na críche sin, bunóidh an Coimisiún é féin ar na sonraí is fearr atá ar fáil ó fhaisnéis iontaofa atá ar fáil go poiblí agus ó fhaisnéis arna soláthar ag na tríú tíortha sin. Cuirfidh an Coimisiún san áireamh aon lacáiste nó aon chineál eile cúitimh atá ar fáil sa tríú tír ábhartha a mbeadh laghdú ar an bpraghas carbóin réamhshocraithe mar thoradh air.

4. Cumhachtaítear don Choimisiún gníomhartha cur chun feidhme a ghlacadh maidir leis an meánphraghas carbóin bliantúil a íocadh iarbhir i gcomhréir le mír 1, agus na praghsanna carbóin réamhshocraithe bliantúla arna gcinneadh, a chomhshó i gcomhréir le mír 3a ina laghdú comhfhreagrach ar an líon deimhnithe SCCT atá le tabhairt suas. Bainfidh na gníomhartha sin leis an bpraghas carbóin arna shloinneadh in airgeadra eachtrach a chomhshó go euro ag an meánráta malairte bliantúil, an fhianaise a cheanglaítear maidir le híocaíocht iarbhir an phraghais carbóin, samplaí d'aon lacáiste ábhartha nó de chineál eile cúitimh dá dtagraítear i mír 1, cáilíochtaí an duine neamhspleách dá dtagraítear i mír 2 den Airteagal seo agus na coinníollacha chun neamhspleáchas an duine sin a fhionnadh. Déanfar na gníomhartha cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 29(2).’;

- (8) Cuirtear an méid seo a leanas in ionad Airteagal 10:

Airteagal 10

Oibreoirí agus suiteálacha i dtríú tíortha a chlárú

1. Arna iarraidh sin d'oibreoir suiteála atá lonnaithe i dtríú tír, déanfaidh an Coimisiún an fhaisnéis faoin oibreoir sin agus faoina shuiteáil a chlárú i gclárann SCCT dá dtagraítear in Airteagal 14.
2. Ar an bhfaisnéis a bheidh san iarraidh ar chlárú dá dtagraítear i mír 1, beidh an fhaisnéis seo a leanas le háireamh i gclárann SCCT tráth an chláraithe:
 - (a) ainm, seoladh, uimhir chlárúcháin chorparáideach nó ghníomhaíochta, sonraí teagmhála an oibreora, agus, más infheidhme, a eintitis rialaithe lena n-áirítear a mháthairchuideachta mar aon leis na doiciméid tacaíochta;
 - (b) +suíomh gach suiteála lena n-áirítear an seoladh iomlán agus comhordanáidí geografacha arna sloinneadh i ndomhanfhad agus i ndomhanleithead, lena n-áirítear sé dheachúil;
 - (c) príomhghníomhaíocht eacnamaíoch na suiteála;
3. Tabharfaidh an Coimisiún fógra don oibreoir faoin gclárú i gclárann SCCT. Beidh an clárú bailí ar feadh thréimhse 5 bliana ón dáta a thugtar fógra faoi d'oibreoir na suiteála.
4. Cuirfidh an t-oibreoir an Coimisiún ar an eolas gan mhoill faoi aon athrú ar an bhfaisnéis dá dtagraítear i mír 2 a thagann chun cinn tar éis an chláraithe, agus tabharfaidh an Coimisiún an fhaisnéis ábhartha cothrom le dáta i gclárann SCCT.

5. Déanfaidh an t-oibreoir an méid seo a leanas:
- (a) na hastaíochtaí leabaithe a chinneadh, ar astaíochtaí iad a ríomhtar i gcomhréir leis na modhanna a leagtar amach in Iarscríbhinn IV, de réir chineál na n-earraí a tháirgtear ag an tsuiteáil dá dtagraítear i mír 1 den Airteagal seo;
 - (b) a áirithiú go ndéanann fíoraitheoir atá creidiúnaithe de bhun Airteagal 18 na hastaíochtaí leabaithe dá dtagraítear i bpointe (a) den mhír seo a fhíorú i gcomhréir leis na prionsabail fíorúcháin a leagtar amach in Iarscríbhinn VI;
 - (c) cóip a choimeád den tuarascáil fíorúcháin chomh maith le taifid den fhaisnéis a cheanglaítear chun na hastaíochtaí leabaithe in earraí a ríomh i gcomhréir leis na ceanglais a leagtar síos in Iarscríbhinn V ar feadh tréimhse 4 bliana tar éis an fíorú a dhéanamh agus, i gcás inarb infheidhme, cóip a choimeád den doiciméadacht a cheanglaítear chun a léiriú go raibh na hastaíochtaí leabaithe dearbhaithe faoi réir praghas carbóin i dtríú tír a íocadh iarbhair, go dtí deireadh an cheathrú bliain tar éis na bliana a ndearna an duine neamhspleách an fhaisnéis atá sa doiciméadacht sin a fhíorú lena linn i gcomhréir le hAirteagal 9(2);
 - (d) i gcás inarb infheidhme, an praghas carbóin a íocadh i dtríú tír i gcomhréir le hAirteagal 9 a chinneadh, agus doiciméadacht tionlacain agus fianaise a uaslódáil.

6. Beidh na taifid dá dtagraítear i mír 5, pointe (c), den Airteagal seo mionsonraithe a dhóthain chun fíorú na n-astaíochtaí leabaithe a chumasú i gcomhréir le hAirteagal 8 agus Iarscríbhinn VI, agus chun an t-athbhreithniú a chumasú, i gcomhréir le hAirteagal 19, ar an dearbhú SCCT arna dhéanamh ag dearbhóir SCCT údaráithe ar nochtadh an fhaisnéis ábhartha dó i gcomhréir le mír 7 den Airteagal seo.
7. Féadfaidh oibreoir an fhaisnéis maidir le fíorú astaíochtaí leabaithe agus an praghas carbóin a íocadh i dtríú tír dá dtagraítear i mír 5 den Airteagal seo a nochtadh do dhearbhoir SCCT údaráithe. Beidh an dearbhóir SCCT údaráithe i dteideal úsáid a bhaint as an bhfaisnéis nochta sin chun an oibleagáid dá dtagraítear in Airteagal 8 a chomhlíonadh.
8. Féadfaidh an t-oibreoir a iarraidh, tráth ar bith, go ndéanfaí é a dhíchhlárú ó chlárլann SCCT. Déanfaidh an Coimisiún, arna iarraidh sin dó, agus tar éis dó fógra a thabhairt do na húdaráis inniúla, an t-oibreoir a dhíchhlárú agus an fhaisnéis faoin oibreoir sin agus faoina shuiteáil a scríosadh ó chlárլann SCCT, ar choinníoll nach mbeidh gá leis an bhfaisnéis sin chun an t-athbhreithniú a dhéanamh ar dhearbhuir SCCT a tíolacadh. Féadfaidh an Coimisiún, tar éis dó deis a thabhairt don oibreoir lena mbaineann éisteacht a fháil agus tar éis dul i gcomhairle leis na húdaráis inniúla ábhartha, an fhaisnéis a dhíchhlárú freisin má fhionnann an Coimisiún nach bhfuil an fhaisnéis faoin oibreoir sin cruinn a thuilleadh. Cuirfidh an Coimisiún na húdaráis inniúla ar an eolas faoin díchlárú sin.’;

- (9) cuirtear an tAirteagal 10a seo a leanas isteach:

‘Airteagal 10a

Fíoraitheoirí creidiúnaithe a chlárú

1. I gcás ina ndeonaítear creidiúnú i gcomhréir le hAirteagal 18, cuirfidh an fíoraitheoir creidiúnaithe iarraidh ar chlárú i gclárlann SCCT faoi bhráid údarás inniúil an Bhallstáit ina bhfuil an comhlacht náisiúnta creidiúnaithe bunaithe. Déanfar an iarraidh ar chlárú a thíolacadh laistigh de 2 mhí tar éis an creidiúnú a dheonú, ach ní roimh an 1 Meán Fómhair 2026. Déanfaidh an t-údarás inniúil an fhaisnéis maidir le fíoraitheoirí creidiúnaithe a chlárú i gclárlann SCCT.
2. San iarraidh ar chlárú dá dtagraítear i mír 1, beidh an fhaisnéis seo a leanas, ar a laghad, le háireamh i gclárlann SCCT tráth an chlárú:
 - (a) ainm agus uimhir chéannachta chreidiúnaithe uathúil an fhíoraitheora;
 - (b) raonta feidhme an chreidiúnaithe atá ábhartha maidir le SCCT;
 - (c) tír bhunaíochta an fhíoraitheora;
 - (d) dáta éifeachtach an chreidiúnaithe agus dáta éaga na ndeimhnithe creidiúnaithe atá ábhartha maidir le SCCT;

- (e) aon fhaisnéis maidir le bearta riaracháin arna bhforchur ar an bhfíoraitheoir atá ábhartha maidir le SCCT;
 - (f) cóip den deimhniú creidiúnaithe is ábhartha do SCCT.
3. Tabharfaidh an t-údarás inniúil fógra don fhíoraitheoir faoin gclárú i gclárlann SCCT. Ina theannta sin, tabharfaidh an t-údarás inniúil, trí chlárlann SCCT, fógra don Choimisiún agus do na húdaráis inniúla eile faoin díchlárú.
 4. Tabharfaidh an fíoraitheoir creidiúnaithe fógra don údarás inniúil maidir le haon athrú ar an bhfaisnéis dá dtagraítear i mír 2 a eascraíonn tar éis an chláráithe. Áiríteoidh an t-údarás inniúil go dtabharfar an fhaisnéis ábhartha cothrom le dáta go cuí i gclárlann SCCT.
 5. Chun críoch Airteagal 10(5)(b), úsáidfídh an fíoraitheoir clárlann SCCT chun na hastaíochtaí leabaithe a fhíorú.
 6. Déanfaidh an t-údarás inniúil fíoraitheoir a dhíchlárú ó chlárlann SCCT i gcás nach bhfuil an fíoraitheoir creidiúnaithe a thuilleadh de bhun Airteagal 18 nó i gcás nár chomhlíon an fíoraitheoir an oibleagáid a leagtar síos i mír 4. Tabharfaidh an t-údarás inniúil fógra don Choimisiún agus do na húdaráis inniúla eile faoin díchlárú. Déanfaidh an t-údarás inniúil an fhaisnéis maidir leis an bhfíoraitheoir creidiúnaithe sin a scriosadh ó chlárlann SCCT ar choinníoll nach bhfuil gá leis an bhfaisnéis sin chun athbhreithniú a dhéanamh ar dhearbhuíthe SCCT a tíolacadh.’;

(10) Leasaítear Airteagal 11 mar a leanas:

(a) i mír 1, an chéad fhomhír, cuirtear an abairt seo a leanas isteach:

‘Áiritheoidh gach Ballstát go mbeidh na cumhachtaí uile is gá ag an údarás ainmnithe chun a bhfeidhmeanna agus a ndualgais a chomhlíonadh faoin Rialachán seo.’;

(b) cuirtear an mhír 3 seo a leanas isteach:

‘3. Chun críche na tuarascála de bhun Airteagal 30(6), soláthróidh na húdaráis inniúla, arna iarraidh sin don Choimisiún agus ar bhonn an cheistneora, faisnéis ábhartha maidir le cur chun feidhme an Rialacháin seo.’;

(11) Leasaítear Airteagal 14 mar a leanas:

(a) cuirtear an méid seo a leanas in ionad mhíreanna 3 agus 4:

- ‘3. Beidh i gclárlann SCCT, i roinn ar leithligh den chlárlann, an fhaisnéis faoi na hoibreoirí agus suiteálacha i dtríú tíortha arna gclárú i gcomhréir le hAirteagal 10(2) agus an fhaisnéis faoi na fíoraitheoirí creidiúnaithe arna gclárú i gcomhréir le hAirteagal 10a.
4. Beidh an fhaisnéis i gclárlann SCCT dá dtagraítear i míreanna 2 agus 3 faoi rún, cé is moite d’ainmneacha, seoltaí, uimhreacha clárúcháin corparáideacha nó gníomhaíochta, sonraí teagmhála na n-oibreoirí, suíomh na suiteálacha i dtríú tíortha agus an fhaisnéis maidir le fíoraitheoirí creidiúnaithe dá dtagraítear in Airteagal 10a(2). Féadfaidh oibreoir rogha a dhéanamh gan rochtain a bheith ag an bpobal ar a ainm, a sheoladh, a uimhir chlárúcháin chorparáideach nó ghníomhaíochta, a shonraí teagmhála agus suíomh a shuiteálacha. Déanfaidh an Coimisiún an fhaisnéis phoiblí i gclárlann SCCT a chur ar fáil i bhformáid idir-inoibritheach.’;

(b) cuirtear an méid seo a leanas in ionad mhír 6:

‘6. Glacfaidh an Coimisiún gníomhartha cur chun feidhme maidir le bonneagar agus próisis agus nósanna imeachta sonracha chlárann SCCT, lena n-áirítear an anailís riosca dá dtagraítear in Airteagal 15, na bunachair sonraí leictreonacha ina bhfuil an fhaisnéis dá dtagraítear i míreanna 2 agus 3 den Airteagal seo, na nósanna imeachta agus na dintiúir theicniúla le haghaidh an tarmligthe dá dtagraítear in Airteagal 5(7a), sonraí na gcuntas atá i gclárann SCCT dá dtagraítear in Airteagal 16, tarchur na faisnéise maidir le díol agus athcheannach deimhnithe SCCT dá dtagraítear in Airteagal 20 chuig clárann SCCT, agus cros-seiceáil na faisnéise dá dtagraítear in Airteagal 25(3) agus an fhaisnéis mar a thagraítear dó in Airteagal 25a(3). Déanfar na gníomhartha cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 29(2).’;

(12) Leasaítear Airteagal 17 mar a leanas:

(a) i mír 1, cuirtear na fomhíreanna seo a leanas in ionad an dara fomhír:

‘Sula ndeonófar stádas dearbhóra SCCT údaraithe, féadfaidh an t-údarás inniúil dul i gcomhairle leis na húdaráis inniúla ábhartha nó leis an gCoimisiún trí chlárú SCCT maidir le comhlíonadh na gcritéir a leagtar amach i mír 2. Ní mhairfidh an comhairliúchán níos mó ná 15 lá féilire.;

(aa) cuirtear an méid seo a leanas in ionad mhír 5:

5. Chun na critéir a leagtar amach i mír 2, pointe (b), den Airteagal seo a chomhlíonadh, éileoidh an t-údarás inniúil go soláthrófar ráthaíocht más rud é nach raibh an t-iarratasóir bunaithe ar feadh an 2 bhliain airgeadais roimh an mbliain a cuireadh isteach an t-iarratas i gcomhréir le hAirteagal 5(1).

Socróidh an t-údarás inniúil méid na ráthaíochta sin ag an méid arna ríomh mar luach comhiomlán líon na ndeimhnithe SCCT a bheadh ar an dearbhóir SCCT údaráithe a ghéilleadh i gcomhréir le hAirteagal 22 i leith allmhairí earraí a thuairiscítear i gcomhréir le hAirteagal 5(5), pointe (g), agus an coigeartú is gá á chur san áireamh, is é sin an coigeartú chun léiriú a thabhairt ar a mhéid a leithdháiltear lamháltais CTA AE saor in aisce i gcomhréir le hAirteagal 31. Ráthaíocht bhaine a bheidh sa ráthaíocht a sholáthrófar, atá iníoctha ar an gcéad éileamh, ag institiúid airgeadais a oibríonn san Aontas nó trí aon fhoirm eile ráthaíochta lena soláthraítear dearbhú coibhéiseach.

(aaa) cuirtear an méid seo a leanas in ionad mhír 7:

‘7. Scaoilfidh an t-údarás inniúil an ráthaíocht go díreach tar éis an 30 Meán Fómhair den dara bliain inar thug an dearbhóir SCCT údaráithe deimhnithe SCCT suas i gcomhréir le hAirteagal 22.’;

(aaaa) cuirtear an mhír 7a seo a leanas isteach:

7a. De mhaolú ar Airteagal 4, i gcás ina mbeidh iarratas curtha isteach ag allmhaireoir nó ag ionadaí custaim indíreach i gcomhréir le hAirteagal 5 faoin 31 Márta 2026, féadfaidh an t-allmhaireoir sin nó an t-ionadaí custaim indíreach sin leanúint go sealadach d'earraí a allmhairiú go dtí go ndéanfaidh an t-údarás inniúil cinneadh faoin Airteagal seo.

I gcás ina ndiúltóidh an t-údarás inniúil an t-údarú a dheonú i gcomhréir le hAirteagal 17(3), bunóidh an t-údarás inniúil, laistigh de mhí amháin ó dháta an chinnidh, na hastaíochtaí atá leabaithe sna hearraí a allmhairíodh idir an 1 Eanáir 2026 agus dáta an chinnidh sin, ar bhonn na faisnéise a cuireadh in iúl i gcomhréir le hAirteagal 25(3) agus faoi threoir na luachanna réamhshocraithe i gcomhréir leis na modhanna a leagtar amach in Iarscríbhinn IV, agus ar bhonn aon fhaisnéis ábhartha eile.

Na hastaíochtaí sin arna mbunú, úsáidfear iad chun pionóis a ríomh i gcomhréir le hAirteagal 26(2a).

- (b) i mír 8, cuirtear an méid seo a leanas in ionad an dara fomhír:

‘Sula ndéanfar stádas dearbhóra SCCT údaraithe a chúlghairm, tabharfaidh an t-údarás inniúil an deis don dearbhóir SCCT údaraithe éisteacht a fháil. Féadfaidh an t-údarás inniúil dul i gcomhairle leis na húdaráis inniúla ábhartha nó leis an gCoimisiún trí chlárann SCCT maidir leis na coinníollacha agus na critéir a bhaineann leis an gcúlghairm. Ní mhairfidh an comhairliúchán níos mó ná 15 lá féilire.’;

- (c) i mír 10, cuirtear an méid seo a leanas in ionad phointe (e):

‘(e) na sprioc-amanna sonracha, raon feidhme agus formáid an nós imeachta comhairliúcháin dá dtagraítear i míreanna 1 agus 8 den Airteagal seo.’;

(12a) Leasaítear Airteagal 18 mar a leanas:

(a) scriostar mír 1;

(b) cuirtear an méid seo a leanas in ionad mhír 2:

‘2. Féadfaidh comhlacht creidiúnaithe náisiúnta, arna iarraidh sin dó, duine dlítheanach a chreidiúnú chun bheith ina fhíoraitheoir chun críche an Rialacháin seo i gcás ina measann sé, ar bhonn na doiciméadachta a chuirtear isteach chuige, go bhfuil sé d’acmhainn ag an duine sin na prionsabail fíorúcháin dá dtagraítear in Iarscríbhinn VI a chur i bhfeidhm agus cúraimí fíorúcháin na n-astaíochtaí leabaithe de bhun Airteagail 8 agus 10 á ndéanamh aige. I gcás ina gcreidiúnófar an t-iarratasóir i gcomhréir le Rialachán Cur Chun Feidhme (AE) 2018/2067 le haghaidh grúpa ábhartha gníomhaíochtaí, cuirfidh an comhlacht náisiúnta creidiúnaithe é sin san áireamh sa mheasúnú a dhéanfaidh sé ar cháilíochtaí fíoraitheora chreidiúnaithe atá riachtanach chun fíoruithe a dhéanamh chun críoch an Rialacháin seo.’;

(13) in Airteagal 19(3), cuirtear an méid seo a leanas in ionad an dara fomhír:

‘Éascóidh an Coimisiún freisin an malartú faisnéise leis na húdaráis inniúla maidir le gníomhaíochtaí calaoiseacha, na conclúidí de bhun Airteagal 25a agus na pionóis arna bhforchur i gcomhréir le hAirteagal 26.’;

(14) Leasaítear Airteagal 20 mar a leanas:

(a) cuirtear an méid seo a leanas in ionad mhír 1:

‘1. Ón 1 Feabhra 2027 ar aghaidh, díolfaidh na Ballstáit deimhnithe SCCT ar ardán lárnach coiteann le dearbhóirí SCCT údaraithe atá bunaithe sa Bhallstát sin.’;

(b) cuirtear an méid seo a leanas in ionad mhír 3:

‘3. Déanfar an fhaisnéis faoi dhíol agus athcheannach deimhnithe SCCT ar an ardán lárnach coiteann a aistriú chuig clárann SCCT ag deireadh gach lae oibre.’

(ba) cuirtear isteach an mhír seo a leanas:

‘5a. Maoineofar na costais a thabhaítear i ndáil le bunú, oibriú agus bainistiú an ardáin lárnaigh choitinn le táillí is iníoctha ag dearbhóirí SCCT údaraithe. Is as buiséad ginearálta an Aontais a íocfar na costais sin ar dtús. An t-ioncam a ghinfidh na táillí, is ioncam sannta inmheánach a bheidh ann i gcomhréir le hAirteagal 21(3)(a) de Rialachán (AE, Euratom) Uimh. 2509/2024 ó Pharlaimint na hEorpa agus ón gComhairle. Sannfar é chun na costais a bhaineann le bunú, oibriú agus bainistiú an ardáin lárnaigh choitinn a chumhdach. Aon ioncam a bheidh fágtha tar éis na costais sin a ghlanadh, sannfar do bhuiséad an Aontais é. Tráth a leanfar ina dhiaidh sin nósanna imeachta soláthair chomhpháirtigh chun an t-ardán lárnach coiteann a oibriú agus a bhainistiú, féadfaidh an Coimisiún a chinneadh, trí bhíthin gníomh tarmligthe arna ghlacadh i gcomhréir le mír 6, gur leis na táillí is iníoctha ag dearbhóirí SCCT údaraithe a mhaoineofar, go díreach, na costais a bhaineann le hoibriú agus bainistiú an ardáin.’

(c) cuirtear an méid seo a leanas in ionad mhír 6:

- ‘6. Cumhachtaítear don Choimisiún gníomhartha tarmligthe a ghlacadh i gcomhréir le hAirteagal 28 lena bhforlíontar an Rialachán seo trí shonrú breise a dhéanamh ar uainiú, riarachán, struchtúr agus leibhéal na dtáillí, agus ar ghnéithe eile a bhaineann leis an mbainistiú ar dhíol agus athcheannach deimhnithe SCCT agus le heagrú agus úsáid an ardáin lárnaigh choitinn, ag féachaint le comhleanúnachas a áirithiú le nósanna imeachta Rialachán Tarmligthe (AE) Uimh. 2023/2830 ón gCoimisiún*. Áiritheofar leis na gníomhartha tarmligthe go mbeidh eagrú agus úsáid an ardáin lárnaigh choitinn costéifeachtúil, go socrófar leibhéal na dtáillí chun na costais ábhartha a chumhdach go beacht agus go seachnófar costais riaracháin mhíchuí.

* Rialachán Tarmligthe (AE) 2023/2830 ón gCoimisiún an 17 Deireadh Fómhair 2023 lena bhforlíontar Treoir 2003/87/CE ó Pharlaimint na hEorpa agus ón gComhairle trí rialacha a leagan síos maidir le huainiú, riarachán agus gnéithe eile a bhaineann le ceantáil lamháltas astaíochtaí gás ceaptha teasa (IO L, 2023/2830, 20.12.2023, ELI: http://data.europa.eu/eli/reg_del/2023/2830/oj);

(15) Leasaítear Airteagal 21 mar a leanas:

(a) i mír 1, cuirtear an méid seo a leanas in ionad na chéad fhomhíre:

‘Ríomhfaidh an Coimisiún praghas na ndeimhnithe SCCT mar mheán na bpraghsanna scoir lamháltais CTA AE ar an ardán ceantála, i gcomhréir leis na nósanna imeachta a leagtar síos i Rialachán Tarmligthe (AE) Uimh. 2023/2830 le haghaidh gach seachtaine féilire.’;

(b) cuirtear an mhír 1a seo a leanas isteach:

‘1a. De mhaolú ar mhír 1, ríomhfaidh an Coimisiún praghas na ndeimhnithe SCCT a chomhfhreagraíonn do na hastaíochtaí leabaithe a dearbhaíodh don bhliain 2026 i gcomhréir le hAirteagal 6(2)(b), mar mheán ráithiúil phraghsanna scoir lamháltais CTA AE ar an ardán ceantála, i gcomhréir leis na nósanna imeachta a leagtar síos i Rialachán Tarmligthe (AE) Uimh. 2023/2830, den ráithe allmhairithe na n-earraí ina bhfuil na hastaíochtaí sin leabaithe.’;

(c) cuirtear an méid seo a leanas in ionad mhír 3:

‘3. Cumhachtaítear don Choimisiún gníomhartha cur chun feidhme a ghlacadh maidir le cur i bhfeidhm na modheolaíochta dá bhforáiltear i míreanna 1 agus 1a chun praghas na ndeimhnithe SCCT a ríomh agus na socruithe praiticiúla a dhéanamh chun an praghas sin a fhoilsiú. Déanfar na gníomhartha cur chun feidhme sin a ghlacadh i gcomhréir leis an nós imeachta scrúdúcháin dá dtagraítear in Airteagal 29(2).’;

(16) Leasaítear Airteagal 22 mar a leanas:

(a) i mír 1, cuirtear an méid seo a leanas in ionad na chéad abairte:

‘Faoin 30 Meán Fómhair gach bliain, agus den chéad uair in 2027 le haghaidh na bliana 2026, déanfaidh an dearbhóir SCCT údaraithe líon deimhnithe SCCT a thabhairt suas trí chlárann SCCT a chomhfhreagraíonn do na hastaíochtaí leabaithe atá dearbhaithe i gcomhréir le hAirteagal 6(2), pointe (c), agus atá fíoraithe i gcomhréir le hAirteagal 8, le haghaidh na bliana féilire roimh an mbliain ina dtugtar suas iad.’;

(b) cuirtear an méid seo a leanas in ionad mhír 2:

‘2. Ón 2027 ar aghaidh, áiritheoidh an dearbhóir SCCT údaraithe go gcomhfhreagraíonn an líon deimhnithe SCCT ar a chuntas i gclárann SCCT ag deireadh gach ráithe do 50 % ar a laghad de na hastaíochtaí leabaithe sna hearraí uile atá allmhairithe aige ó thús na bliana féilire, arna chinneadh faoi threoir aon cheann díobh seo a leanas:

- (a) luachanna réamhshocraithe i gcomhréir leis na modhanna a leagtar amach in Iarscríbhinn IV gan an uasmharcáil dá dtagraítear i Roinn 4.1 den Iarscríbhinn sin; nó
- (b) an líon deimhnithe SCCT a tugadh suas i gcomhréir le mír 1 le haghaidh na bliana féilire roimh an mbliain inar tugadh suas iad, ar choinníoll go dtagraítear sa dearbhú custaim le haghaidh allmhairiú earraí do na hearraí céanna de réir cód AC agus tíortha tionscnaimh leis an dearbhú SCCT a tiolacadh sa bhliain féilire roimh an mbliain reatha.

Chun críoch na míre seo, cuirfear san áireamh an coigeartú le haghaidh leithdháileadh saor in aisce dá dtagraítear in Airteagal 31.’;

(c) cuirtear an mhír 2a seo a leanas isteach:

‘2a. Comhlíonfaidh an dearbhóir SCCT údaraithe an oibleagáid a leagtar amach i mír 2 roimh dheireadh na ráithe tar éis na ráithe ina sáraítear an tairseach mhais-bhunaithe aonair a leagtar síos in Iarscríbhinn VII.’;

(17) Leasaítear Airteagal 23 mar a leanas:

(a) i mír 1, an dara fomhír, cuirtear an méid seo a leanas in ionad an dara habairt:

Déanfaidh an dearbhóir SCCT údaraithe an iarraidh ar athcheannach a thíolacadh faoin 31 Deireadh Fómhair gach bliain ar lena linn a rinneadh deimhnithe SCCT a thabhairt suas.’;

(b) cuirtear an méid seo a leanas in ionad mhír 2:

‘2. Beidh an líon deimhnithe SCCT atá faoi réir an athcheannaigh dá dtagraítear i mír 1 teoranta don líon iomlán deimhnithe SCCT a raibh sé d’oibleagáid ar an dearbhóir SCCT údaraithe a cheannach de bhun Airteagal 22(2) le linn na bliana féilire ar ceannaíodh na deimhnithe SCCT.

I gcás dearbhóir SCCT údaráithe a bhí ag ceannach deimhnithe SCCT i mbliain féilire agus é ag súil go sárófaí an tairseach mhais-bhunaithe aonair dá dtagraítear in Airteagal 2a agus nach sáraíonn sé an tairseach sin, athcheannófar gach deimhniú SCCT arna iarraidh sin don dearbhóir údaráithe de bhun mhír 1 den Airteagal seo.’;

(c) cuirtear an mhír 2a seo a leanas isteach:

‘2a. De mhaolú ar mhír 2, ní fhéadfar deimhnithe SCCT a cheannófar in 2027 i ndáil leis na hastaíochtaí leabaithe don bhliain 2026 a athcheannach ach amháin in 2027.’;

(18) Cuirtear an méid seo a leanas in ionad Airteagal 24:

Airteagal 24

Deimhnithe SCCT a chur ar ceal

1. An 1 Samhain gach bliain, cuirfidh an Coimisiún ar ceal aon deimhniú SCCT a ceannaíodh le linn na bliana roimh an mbliain féilire roimhe sin agus a bhí fágtha i gcuntas dearbhóra SCCT údaraithe i gclárann SCCT. Cuirfear na deimhnithe SCCT sin ar ceal gan aon chúiteamh.’;
2. De mhaolú ar mhír 1, an 1 Samhain 2027, cuirfidh an Coimisiún ar ceal aon deimhniú SCCT a ceannaíodh i ndáil leis na hastaíochtaí leabaithe don bhliain 2026. Cuirfear na deimhnithe SCCT sin ar ceal gan aon chúiteamh.’
3. I gcás ina ndéantar líon na ndeimhnithe SCCT atá le géilleadh a chonspóid i ndíospóid atá ar feitheamh i mBallstát, cuirfidh an Coimisiún cealú na ndeimhnithe SCCT ar fionraí a mhéid a chomhfhreagraíonn don mhéid is ábhar don díospóid. Déanfaidh údarás inniúil an Bhallstáit ina bhfuil an dearbhóir SCCT údaraithe bunaithe aon fhaisnéis ábhartha a chur in iúl gan mhoill don Choimisiún.’;

(19) Leasaítear Airteagal 25 mar a leanas:

(-a) cuirtear an méid seo a leanas in ionad mhír 1:

‘1. Gan dochar d’Airteagal 2a, níor cheart do na húdaráis chustaim a cheadú d’aon duine cé is moite de dhearbhoir SCCT údaráithe earraí a allmhairiú.’;

(a) cuirtear an méid seo a leanas in ionad mhír 2:

‘2. Déanfaidh na húdaráis chustaim go tréimhsiúil agus go huathoibríoch, go háirithe trí bhíthin an tsásra faireachais a bunaíodh de bhun Airteagal 56(5) de Rialachán (AE) Uimh. 952/2013, faisnéis shonrach maidir leis na hearraí a dhearbhaítear le haghaidh allmhairiú a chur in iúl don Choimisiún. ‘Áireofar leis an bhfaisnéis sin an uimhir EORI nó an cineál aitheantais a dearbhaíodh i gcomhréir le hAirteagal 6(2) de Rialachán Tarmligthe (AE) 2015/2446 ón gCoimisiún atá ag an allmhaireoir nó an dearbhoir SCCT údaráithe chomh maith le huimhir chuntais SCCT an dearbhóra SCCT údaráithe, cód AC ocht ndigit na n-earraí, an chainníocht, an tír thionscnaimh, dáta an dearbhaithe custaim agus an nós imeachta custaim. I gcás nach bhfuil aon uimhir EORI ag an allmhaireoir, cuirfidh na húdaráis chustaim ainm, seoladh agus, i gcás ina mbeidh fáil orthu, faisnéis teagmhála an allmhaireora in iúl don Choimisiún freisin.’;

(b) cuirtear an méid seo a leanas in ionad mhír 3:

‘3. Cuirfidh an Coimisiún an fhaisnéis dá dtagraítear i mír 2 den Airteagal seo in iúl go tréimhsiúil d’údarás inniúil an Bhallstáit ina bhfuil an dearbhóir SCCT údaráithe nó an t-allmhaireoir bunaithe agus déanfaidh sé, i gcás gach dearbhóra SCCT, cros-seiceáil ar an bhfaisnéis sin leis na sonraí i gclárann SCCT de bhun Airteagal 14.’;

(c) cuirtear an méid seo a leanas in ionad mhír 4:

‘4. Féadfaidh na húdaráis chustaim, i gcomhréir le hAirteagal 12(1) de Rialachán (AE) Uimh. 952/2013, faisnéis rúnda a fhaigheann na húdaráis chustaim agus a ndualgais á gcomhlíonadh acu, nó a chuirtear ar fáil ar bhonn rúnda do na húdaráis chustaim, a chur in iúl don Choimisiún agus d’údarás inniúil an Bhallstáit a rinne stádas an dearbhóra SCCT údaráithe a dheonú nó d’údarás inniúil an Bhallstáit ina bhfuil an t-allmhaireoir bunaithe.’;

(20) cuirtear an tAirteagal 25a a seo a leanas isteach:

‘Airteagal 25a

Forfheidhmiú na tairisí a leagtar síos i bpointe 1 d’Iarscríbhinn VII agus faireachán a dhéanamh uirthi

1. Déanfaidh an Coimisiún faireachán ar allmhairí earraí chun an tairseach mhais-bhunaithe aonair a leagtar síos i bpointe 1 d’Iarscríbhinn VII a chomhlíonadh.

Féadfaidh údarais inniúla an Bhallstáit ina bhfuil an t-allmhaireoir bunaithe faireachán a dhéanamh freisin ar chomhlíonadh na tairisí mais-bhunaithe aonair a leagtar síos i bpointe 1 d’Iarscríbhinn VII.

Malartóidh an Coimisiún go tréimhsiúil agus go huathoibríoch leis na húdarais inniúla an fhaisnéis is gá chun faireachán a dhéanamh ar allmhaireoirí trí chlárլann SCCT. Áireofar san fhaisnéis sin liosta allmhaireoirí a sháraíonn 90 % den tairseach mhais-bhunaithe aonair a leagtar síos i bpointe 1 d’Iarscríbhinn VII.

2. I gcás ina measfaidh an Coimisiún, bunaithe ar réamh-mheasúnú agus ar an bhfaisnéis a chuir na húdarais chustaim in iúl don Choimisiún de bhun Airteagal 25(2), gur sháraigh allmhaireoir an tairseach mhais-bhunaithe aonair, cuirfidh sé an fhaisnéis sin chomh maith leis an mbonn dá réamh-mheasúnú in iúl d’údarás inniúil an Bhallstáit ina bhfuil an t-allmhaireoir bunaithe.

Féadfaidh an t-údarás inniúil an fhianaise dhoiciméadach is gá chun measúnú a dhéanamh ar cé acu a sháraigh nó nár sháraigh an t-allmhaireoir an tairseach mhais-bhunaithe aonair a iarraidh ar an allmhaireoir nó ar an gCoimisiún. I gcás nach leor an fhianaise dhoiciméadach chun a mheas gur sháraigh an t-allmhaireoir an tairseach sin, féadfaidh na húdaráis inniúla fianaise dhoiciméadach bhreise a iarraidh ar na húdaráis chustaim má tá sí ar fáil.

3. I gcás ina gcinnfidh an t-údarás inniúil gur sháraigh allmhaireoir, nach dearbhóir SCCT údaráithe é, an tairseach mhais-bhunaithe aonair, glacfaidh sé cinneadh gan moill mhíchuí chuige sin. Beidh na cúiseanna atá leis an gcinneadh mar aon le faisnéis faoin gceart chun achomharc a dhéanamh san áireamh sa chinneadh. Cuirfidh an t-údarás inniúil an t-allmhaireoir ar an eolas faoi na hoibleagáidí is infheidhme faoin Rialachán seo lena n-áirítear, i gcás inarb infheidhme, an oibleagáid stádas dearbhóra SCCT údaráithe a fháil i gcomhréir le hAirteagal 5 sula bhféadfaidh an t-allmhaireoir aon earraí eile a allmhairiú. Tabharfaidh an t-údarás inniúil fógra do na húdaráis chustaim agus don Choimisiún freisin faoin gcinneadh trí chlárann SCCT.

I gcás ina ndéanann ionadaí custaim indíreach amháin nó níos mó ionadaíocht ar allmhaireoir má sháraíonn sé an tairseach dá dtagraítear in Airteagal 2a, cuirfidh an t-údarás inniúil na hionadaithe custaim indíreacha arna gceapadh i gcomhréir le hAirteagal 5(1a) nó le hAirteagal 5(2) ar an eolas faoi sin.

Ní bheidh éifeachtaí fionraíochta ann má chuirtear achomharc isteach in aghaidh cinneadh lena gcinntear gur sháraigh an t-allmhaireoir an tairseach mhais-bhunaithe aonair.

4. Chun a chinneadh ar sháraigh allmhaireoir an tairseach mhais-bhunaithe aonair nó nár sháraigh, tabharfaidh údarás inniúil neamhaird ar chleachtas nó ar shocrú nó ar shraith cleachtas nó socruithe a cuireadh i bhfeidhm arb é is príomhchuspóir dó/dóibh, nó a bhfuil sé de phríomhchuspóir aige/acu, titim faoi bhun na tairsí agus nach bhfuil fíor.

Measfar nach fíorchleachtas ná fíorshocrú is ea é, nó go deimhin, sraith de chleachtais nó de shocruithe, i gcás nach féidir a mheas, ag féachaint do na fíorais agus do na himthosca ábhartha uile, gur cuireadh i bhfeidhm iad ar chúiseanna tráchtála bailí a bhaineann le gníomhaíocht eacnamaíoch an allmhaireora.

Chun críoch Airteagal 17(2), pointe (a) agus Airteagal 26(2a), i gcás ina gcinntídh an t-údarás inniúil go raibh an t-allmhaireoir ag gabháil do chleachtas nó do shocrú, nó do shraith de chleachtais nó de shocruithe, a mheastar nach bhfuil ceart, measfar go raibh baint ag an allmhaireoir le sárú tromchúiseach ar an Rialachán seo.

5. Chun críocha faireacháin faoin Airteagal seo, leagfaidh an Coimisiún amach go tréimhsiúil na fachtóirí sonracha riosca agus pointí airde, uair amháin sa bhliain féilire ar a laghad nó de réir mar a thagann fadhbanna chun cinn, bunaithe ar anailís ar na rioscaí a bhaineann leis an tairseach, agus faisnéis atá i gclárlann SCCT, sonraí arna gcur in iúl ag údaráis chustaim i gcomhréir le hAirteagal 25, agus foinsí faisnéise ábhartha eile á gcur san áireamh, lena n-áirítear neamhrialtachtaí arna sainaithint mar thoradh ar na rialuithe a rinneadh i gcomhréir le Airteagal 15(1). Cuirfear an fhaisnéis sin agus na pointí airde sin in iúl do na húdaráis inniúla agus do na húdaráis chustaim i gcás inarb ábhartha.’;

(21) Leasaítear Airteagal 26 mar a leanas:

(a) cuirtear an méid seo a leanas in ionad mhír 1:

- ‘1. Dearbhóir SCCT údaraithe a mhainníonn, faoin 30 Meán Fómhair gach bliain, an líon deimhnithe SCCT a thabhairt suas a chomhfhreagraíonn do na hastaíochtaí atá leabaithe in earraí a allmhairíodh le linn na bliana féilire roimhe sin, beidh sé faoi dhliteanas pionós a íoc. Beidh an pionós sin comhionann leis an bpionós i leith astaíochtaí iomarcacha a leagtar amach in Airteagal 16(3) de Threoir 2003/87/CE, agus a ardaítear de bhun Airteagal 16(4) den Treoir sin, agus beidh sé infheidhme sa bhliain a allmhairítear na hearraí. Beidh feidhm ag an bpionós sin i gcás gach deimhnithe SCCT nach bhfuil tugtha suas ag an dearbhóir SCCT údaraithe.’;

(b) cuirtear isteach an mhír seo a leanas:

- 1a. De mhaolú ar mhír 1, i gcás ina mainníonn an dearbhóir SCCT údaraithe an líon ceart deimhnithe SCCT a thabhairt suas de thoradh faisnéis mhícheart arna soláthar ag an oibreoir, ag an bhfíoraitheoir nó ag an duine neamhspleách a dheimhníonn doiciméadacht an phraghais carbóin dá dtagraítear in Airteagal 9(2), féadfaidh an t-údarás inniúil an pionós dá dtagraítear sa chéad mhír a laghdú. Beidh an pionós éifeachtach, comhréireach agus athchomhairleach, agus tabharfar aird go háirithe ar fhad, tromchúis, raon feidhme, cineál intinneach agus athdhéanamh an neamhchomhlíonta agus leibhéal comhair an dearbhóra SCCT údaraithe leis an údarás inniúil.

(ba) cuirtear isteach an mhír seo a leanas:

- 2a. Beidh feidhm ag mír 2 freisin maidir leis na hallmhaireoirí nach dearbhóirí SCCT údaraithe iad, i gcás ina sáraíonn siad an tairseach mhais-bhunaithe aonair dá dtagraítear in Airteagal 2a. Chun na críche sin, cuirfear san áireamh na hastaíochtaí iomlána atá leabaithe sna hearraí a d'allmhairigh an t-allmhaireoir sin sa bhliain féilire ábhartha. Nuair a bheidh an pionós íoctha ag an allmhaireoir, scaoilfear é ón oibleagáid dearbhú SCCT a thíolacadh agus ón oibleagáid deimhnithe SCCT a thabhairt suas.

De mhaolú ar an gcéad fhomhír, féadfaidh an t-údarás inniúil an pionós dá bhforáiltear i mír 2 a laghdú i gcás inar sháraigh allmhaireoir an tairseach mhais-bhunaithe aonair faoi nach mó ná 10 % den tairseach sin nó i gcásanna dá dtagraítear in Airteagal 17(7a). Beidh an pionós sin éifeachtach, comhréireach agus athchomhairleach, agus ní bheidh sé níos ísle ná an pionós dá bhforáiltear i mír 1. Nuair a bheidh an pionós íoctha ag an allmhaireoir, scaoilfear é ón oibleagáid dearbhú SCCT a thíolacadh agus ón oibleagáid deimhnithe SCCT a thabhairt suas.

(baa) cuirtear an méid seo a leanas in ionad mhír 3:

- ‘3. Tríd an bpionós a íoc i gcomhréir le mír 1, ní scaoilfear dearbhóir SCCT údaraithe ón oibleagáid an líon deimhnithe SCCT nár tugadh suas go fóill a thabhairt suas i mbliain ar leith.’

(c) cuirtear isteach an mhír seo a leanas:

- 4a. Chun críocha mhíreanna 1 agus 2 den Airteagal seo, ríomhfaidh an t-údarás inniúil an líon iomlán deimhnithe SCCT ba cheart a bheith tugtha suas, bunaithe ar ghlanmhais na n-earraí allmhairithe agus faoi threoir na n-astaíochtaí leabaithe arna gcinneadh de réir luachanna réamhshocráithe i gcomhréir leis na modhanna a leagtar amach in Iarscríbhinn IV agus an coigeartú le haghaidh leithdháileadh saor in aisce dá dtagraítear in Airteagal 31 á chur san áireamh.

(22) in Airteagal 27(2), cuirtear an méid seo a leanas in ionad phointe (b):

‘(b) allmhairí a roinnt go saorga, lena n-áirítear é sin a dhéanamh trí shocruithe nach fíorshocruithe iad, ionas nach sárófar an tairseach mhais-bhunaithe aonair a leagtar amach i bpointe 1 d’Iarscríbhinn VII.’;

(23) Leasaítear Airteagal 28 mar a leanas:

(a) cuirtear an méid seo a leanas in ionad mhíreanna 2 agus 3:

- ‘2. Déanfar an chumhacht chun gníomhartha tarmligthe a ghlacadh dá dtagraítear in Airteagail 2a, 2(10), 2(11), 18(3), 20(6) agus 27(6) a thabhairt don Choimisiún go ceann tréimhse 5 bliana ón [dáta foilsithe an Rialacháin maidir le SCCT (an Rialachán seo)]. Déanfaidh an Coimisiún, tráth nach déanaí ná naoi mí roimh dheireadh na tréimhse cúig bliana, tuarascáil a tharraingt suas maidir le tarmligean na cumhachta. Cuirfear síneadh le tarmligean na cumhachta go hintuigthe go ceann tréimhsí comhfhaid breise, mura rud é go gcuireann Parlaimint na hEorpa nó an Chomhairle in aghaidh an tsínte sin tráth nach déanaí ná 3 mhí roimh dheireadh gach tréimhse.
3. Féadfaidh Parlaimint na hEorpa nó an Chomhairle tarmligean na cumhachta dá dtagraítear in Airteagail 2a, 2(10), 2(11), 18(3), 20(6) agus 27(6) a chúlghairm aon tráth.’;

(b) cuirtear an méid seo a leanas in ionad mhír 7:

‘7. Ní thiocfaidh gníomh tarmligthe a ghlactar de bhun Airteagail 2a, 2(10), 2(11), 18(3), 20(6) nó 27(6) i bhfeidhm ach amháin mura mbeidh aon agóid curtha in iúl ag Parlaimint na hEorpa ná ag an gComhairle laistigh de thréimhse 2 mhí tar éis fógra faoin ngníomh sin a thabhairt do Pharlaimint na hEorpa agus don Chomhairle nó más rud é, roimh dhul in éag na tréimhse sin, go mbeidh Parlaimint na hEorpa agus an Chomhairle araon tar éis a chur in iúl don Choimisiún nach ndéanfaidh siad aon agóid. Cuirfear síneadh 2 mhí leis an tréimhse sin ar thionscnamh Pharlaimint na hEorpa nó na Comhairle.’;

(24) in Airteagal 30(6)(a):

(a) cuirtear an méid seo a leanas in ionad phointe (i):

‘(i) an córas rialachais, lena n-áirítear measúnú ar chur chun feidhme agus riar na ráthaíochtaí agus údarú dhearbhoirí SCCT a dhéanfaidh na Ballstáit;

(b) cuirtear an pointe seo a leanas leis:

‘(v) cur i bhfeidhm na tairsí a leagtar síos i bpointe 1 d’Iarscríbhinn VII, lena n-áirítear an fhéidearthacht an tairseach sin a mhéadú agus tairseach fhorlíontach choinsíneacht-bhunaithe a thabhairt isteach.’;

(25) Leasaítear Airteagal 36(2) mar a leanas:

(a) cuirtear an méid seo a leanas in ionad phointe (b):

‘beidh feidhm ag Airteagal 2(2), Airteagal 2a, Airteagail 4, 6 go 9, 10a, 15 agus 19, Airteagal 21 go 22(1), Airteagal 22(3), agus Airteagail 23 go 27 agus 31 ón 1 Eanáir 2026.’;

(b) cuirtear na pointí seo a leanas isteach:

(c) beidh feidhm ag Airteagal 22(2) ón 1 Eanáir 2027;

(d) beidh feidhm ag Airteagal 20(1), (3), (4) agus (5), ón 1 Feabhra 2027.’;

(26) in Iarscríbhinn I, cuirtear ‘2507 00 80 – Créanna caoilíneacha eile [...] seachas créanna caoilíneacha neamhchailcínithe[...]’ in ionad an chóid AC ‘2507 00 80 – Créanna caoilíneacha eile’;

(27) in Iarscríbhinn II, cuirtear isteach an tábla seo a leanas:

‘Leictreachas

Cód AC	Gás ceaptha teasa
2716 00 00 – Fuinneamh leictreach	Dé-ocsaíd charbóin

’;

(28) leasaítear Iarscríbhinn IV i gcomhréir le hIarscríbhinn I a ghabhann leis an Rialachán seo.

(28a) I roinn 2 d'Iarscríbhinn V, cuirtear an pointe seo a leanas isteach:

‘(e) an fhaisnéis agus an modh a úsáidtear chun na hastaíochtaí leabaithe a ríomh.’;

(28b) i roinn 2, pointe (k) d'Iarscríbhinn VI, cuirtear an méid seo a leanas in ionad phointe (iii):

‘(iii) sainathint na suiteálacha inar táirgeadh an t-ábhar ionchuir (réamhtheachtaí) agus na hastaíochtaí iarbhír ó tháirgeadh an ábhair sin;’;

(29) cuirtear isteach Iarscríbhinn VII nua mar a leagtar amach in Iarscríbhinn II a ghabhann leis an Rialachán seo:

Airteagal 2

Teacht i bhfeidhm

Tiocfaidh an Rialachán seo i bhfeidhm an tríú lá tar éis lá a fhoilsithe in *Iris Oifigiúil an Aontais Eorpaigh*.

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.

Arna dhéanamh sa Bhruiséil,

Thar ceann Pharlaimint na hEorpa

Thar ceann na Comhairle

An tUachtarán

An tUachtarán

IARSCRÍBHINN I

Leasaítear Iarscríbhinn IV mar a leanas:

(0) cuirtear an méid seo a leanas in ionad phointe 3:

‘3. NA HASTAÍOCHTAÍ LEABAITHE IARBHÍR A CHINNEADH LE HAGHAIDH EARRAÍ COIMPLÉASCACHA

Chun na sainastaíochtaí leabaithe iarbhíir a chinneadh le haghaidh earraí coimpléascacha a tháirgtear i suiteáil ar leith, tá an chothromóid seo a leanas le cur i bhfeidhm:

$$SEE_g = \frac{AttrEm_g + EE_{InpMat}}{AL_g}$$

I gcás inarb amhlaidh an méid seo a leanas:

is é $AttrEm_g$ na hastaíochtaí sannta a ghabhann leis na hearraí g;

$AttrEm_g$

is é AL_g leibhéal gníomhaíochta na n-earraí, eadhon, cainníocht na n-earraí sin a táirgeadh sa tsuiteáil sin le linn na tréimhse tuairiscithe, agus

is é EE_{InpMat} na hastaíochtaí leabaithe a ghabhann leis na hábhair (réamhtheachtaithe) ionchuir a caitheadh sa phróiseas táirgthe. Ní bhreithneofar ach ábhair ionchuir (réamhtheachtaithe) a liostaítear in IARSCRÍBHINN I agus de thionscnamh tríú tíortha agus tríú críocha nach bhfuil díolmhaithe de bhun Iarscríbhinn III, Roinn 1. Mar seo a leanas a ríomhtar an EE_{InpMat} is ábhartha:

$$EE_{InpMat} = \sum_{i=1}^n M_i \cdot SEE_i$$

I gcás inarb amhlaidh an méid seo a leanas:

is é mais an ábhair ionchuir (réamhtheachtaí) i a úsáideadh sa phróiseas táirgthe, agus M_i

is iad na sainastaíochtaí leabaithe a ghabhann leis i leith an ábhair ionchuir (réamhtheachtaí) i.

SEE_i Maidir le SEE_i, bainfidh oibreoir na suiteála úsáid as luach na n-astaíochtaí a eascraíonn as an tsuiteáil inar táirgeadh an t-ábhar ionchuir (réamhtheachtaí), ar choinníoll gur féidir sonraí na suiteála a thomhas ar mhodh leormhaith.'

(1) i bpointe 4, scriostar an tríú ró.

(2) leasaítear pointe 4.1 mar a leanas:

(-a) scriostar an chéad abairt;

(-aa) cuirtear an méid seo a leanas in ionad an dara habairt:

‘Socrófar na luachanna réamhshocraithe ag meándéine astaíochta gach tíre onnmhairiúcháin agus le haghaidh gach ceann de na hearraí a liostaítear in Iarscríbhinn I cé is moite de leictreachas, agus méadófar iad trí chorrach a chur leo a cheapfar go comhréireach.’;

(a) cuirtear an méid seo a leanas in ionad an cheathrú habairt:

‘I gcás nach féidir sonraí iontaofa maidir leis an tír onnmhairiúcháin a chur i bhfeidhm i gcás cineál áirithe earraí, beidh na luachanna réamhshocraithe bunaithe ar mheándéine astaíochtaí na ndeich dtír onnmhairiúcháin a bhfuil na déine astaíochtaí is airde acu ar féidir sonraí iontaofa a chur i bhfeidhm ina leith maidir leis an gcineál sin earraí.’;

(b) scriostar an cúigiú abairt;

(3) i bpointe 7, cuirtear an méid seo a leanas in ionad an dara mír:

‘Maidir le dearbhóirí i leith earraí a tháirgtear i dtríú tír, i ngrúpa de thríú tíortha nó i réigiún laistigh de thríú tír, i gcás inar féidir leis na dearbhóirí sin, ar bhonn sonraí iontaofa, a léiriú gurb ísle na luachanna réamhshocraithe malartacha arna n-oiriúnú de réir gnéithe réigiún-sonracha ná na luachanna réamhshocraithe arna gcinneadh ag an gCoimisiún, féadfar na luachanna réamhshocraithe réigiún-sonracha sin a úsáid.’

IARSCRÍBHINN II

Cuirtear an Iarscríbhinn VII seo a leanas isteach:

IARSCRÍBHINN VII

An tairseach dá dtagraítear in Airteagal 2a

1. Socrófar an tairseach dá dtagraítear in Airteagal 2a ag 50 tona glanmhaise.
2. Chun críoch Airteagail 2a(3), beidh feidhm ag an mhodheolaíocht seo a leanas:

$\bar{Q}$ arna roghnú ionas gurb amhlaidh an méid seo a leanas $\frac{\sum_{i=1}^N Em_i \times 1_{-}(Q_i > \bar{Q})}{\text{Iomlán na } n - \text{astaíochtaí}} \geq \text{spriocsciar na } n - \text{astaíochtaí } 99\%$

I gcás inarb amhlaidh an méid seo a leanas:

- $\bar{Q}$ is é an tairseach mhaise i dtonaí lenar féidir spriocsciar áirithe d’astaíochtaí a ghabháil;
- Astaíochtaí bliantúla in aghaidh an allmhaireora; $i, Em_i = \sum_{j=1}^{J_i} q_{i,j} El_j$;
- $q_{i,j}$ is é an méid arna allmhairiú i dtonaí ag an allmhaireoir i den chód AC j ;
- J_i is é an líon cód AC arna n-allmhairiú ag an allmhaireoir i i measc na gceithre earnáil a chuirtear san áireamh (alúmanam, stroighin, leasacháin, iarann agus cruach);
- El_j is é an déine astaíochtaí le haghaidh chód AC j ¹⁵;
- *Iomlán na n – astaíochtaí*: iomlán na n-astaíochtaí CO₂ ó na ceithre earnáil SCCT arna gcur san áireamh, is é sin suim na n-astaíochtaí comhfhreagracha le haghaidh na n-allmhaireoirí uile: $\text{iomlán na } n - \text{astaíochtaí} = \sum_{i=1}^N Em_i$, i gcás inarb N é an líon allmhaireoirí;

15

Tá an déine *astaíochtaí* E_j bunaithe ar na luachanna réamhshocraithe (gan uasmharcáil) le haghaidh astaíochtaí a fhoilsítear le haghaidh na hidirthréimhse.. I gcás stroighne agus táirgí leasacháin, cuirtear astaíochtaí díreacha agus astaíochtaí indíreacha san áireamh; i gcás alúmanaim agus táirgí iarainn agus cruach, ní chuirtear ach astaíochtaí díreacha san áireamh. Maidir le nuashonruithe ar an tairseach a dhéanfar amach anseo, socrófar na luachanna réamhshocraithe i gcomhréir leis na modhanna a leagtar amach in Iarscríbhinn IV gan an uasmharcáil dá dtagraítear i Roinn 4.1 d’Iarscríbhinn IV.

- $Q_i = \sum_{j=1}^{J_i} q_{i,j}$: méid iomlán, i dtonaí, na n-earraí SCCT arna n-allmhairiú ag an allmhaireoir i ;
- $1(Q_i > \bar{Q})$ is feidhm táscaire é atá cothrom le 1 i gcás $Q_i > \bar{Q}$ (is é sin, nuair atá méideanna á n-allmhairiú ag allmhaireoir atá níos airde ná an tairseach mhaise $\bar{Q}$) - tá sé cothrom le 0 seachas sin.

Chun éiginnteacht maidir le hathruithe ar phatrúin trádála a léiriú , cuirtear corrlach 0,25 pointe céatadáin leis an spriocsciar thuas d’astaíochtaí.

Slánófar an tairseach go dtí an deich is gaire.’
